



白雲洞誌

道光戊戌孟冬鐫

同治甲子重刊

西樵白雲洞志

番禺黃子高題

西樵白雲洞志序

西樵爲吾粵名山前明霍益芳始爲之志

國朝馬氏增修之劉南畬著遊覽記又能補馬志之缺畧考証詳確圖繪燦如洵稱完善其後藏板稍稍殘缺同里黃孝廉嘉圃與譚孝廉葑臣重加補刊余嘗識其顛末且深幸前賢講學芳蹤展卷在目不至久而就湮也顧其書編綠始乾隆辛丑而繕成於壬寅所記白雲洞創建諸亭閣僅及丁酉而止厥後築湖隄建書院闢精舍結吟壇絃歌滿谷遊屐麋至己酉以還最稱極盛悉斯記所未及載者今亦旣頽且荒矣余深惜名山勝

白雲洞志

序

一

概之歸於岑寂也亟欲與同志者振興之嘉圃亦慮前人韻事之易於湮沒也爰撿觚以誌焉其書分爲五冊首名勝次傳畧次藝文博採旁搜無幽不闢其數典也不忘其祖其紀事也必當其人凡遊蹤偶至片語留題可存則存并識其人梗概體例較爲詳備且虛衷集益復與好學多聞諸彥相叅訂可謂斟酌無憾者矣去冬以脫稿就正茲復請序於余余惟河東江始闢斯洞子明繼述增修麗弼唐稱之曰志承先者孝也亟趨事者勇也擴大觀而公之有眾仁也今嘉圃纂輯是書無忘乃祖遺跡非卽承先之志乎五越月而書告成非卽趨

事之勇乎剔幽扶隱發巖穴之光於簡冊能令開卷可
以目遊非卽公之有眾乎方今議復舊觀前人創建旣
藉表彰後人繼興必加踴躍從此洞中齋舍有日新無
日廢端賴斯志爲之鼓舞也余嘉其用意以爲先得我
心因不辭而爲之序道光己亥孟春樵麓邵士憲

序

東粵之山首曰羅浮南海之山首曰西樵羅浮四百三十二峯表直五百里而恣遊騁者必登飛雲唯其最高也西樵三十六洞週迴四十里而窮幽邃者必造白雲唯其最勝也白雲洞在廣朗之西麓自前明嘉靖而隆慶而萬厯創之者何東江成之者東江之子子明繼之者趙文懿逮至 國朝踵其事而重加潤色者亦不乏人卒未聞有蒼萃其山川人物而志之者吾友黃嘉圃孝廉寄興於斯朝夕披攷彙爲五冊授諸剞劂而屬序於余余惟嘉圃乃黃明府子

白雲洞志

序

三

初先生之孫也明府少嘗讀書洞中壯歲舉於鄉猶與李容門黎萃堂建龍嵒閣幽居攷業杜門不出及宦成歸里復與陳錦堂岑璞軒輩於漱芳園結吟社行歌坐詠優游林下者三十年以視羊太傅遊峴山謂百歲後有知魂魄猶應登此者其地雖殊其致則一然當時太傅從事如鄒湛諸人未嘗以片言識及爲可惜也若嘉圃者可謂無忘乃祖之志矣且是書之作非徒以承先緒亦足以延幽賞也夫綠嶂麻源無謝客之詩而蹟不著鉅石澗無柳州之記而名不傳今嘉圃以講貫之餘輯爲成帙固可置諸几席

以當臥遊而洞中諸名勝藉是以循舊踪闢新境使
書巖福地不至湮沒於荒烟蔓草中者亦有厚望焉
雖然洞爲諸賢講學處也昔張子厚雲岩致政由縣
令而屏居南山王伯安石穴窮經自驛丞而受封新
建蓋處則爲名儒出則爲名臣然後不負此名山也
覽斯志者可以興矣道光戊戌年十一月初六長至
日弟關炳垣謹序併書

白雲洞志自序

西樵勝境向以碧玉洞爲最第鳥道縈迴雖造父無所施其技而白雲洞僻在山西前賢罕有題咏者自有明嘉靖間何東江先生始闢洞門子明繼志築室讀書弼唐龐子題其洞而爲之銘名流類聚共結詞壇彙成白雲洞倡和集而洞名遂著洎萬厯中趙文懿公增設滌心橋雲瀑亭采芝徑而洞名益彰自是二百年來未聞有踵其事者豈記載之或遺歟抑斯洞之顯晦有時也披雲臺上舊有自娛軒 先大父孚初公少嘗讀書於此旋改

白雲洞志

自序

五

嚮往居繼又改建廉香書室然是軒建自何人關於何年志乘缺有間矣其不惜傾囊購地重振名山使十餘年間洞中煥然改觀實倡之自龍從閣始考西樵遊覽記乾隆乙未歲先大父與黎萃堂李容門諸先生關建龍從閣甫成繼之者則有劉南畬之雲厂山房闔魯窩之環綺亭亦越丁酉而雲溪書院攻玉樓沁心光分諸亭遂接踵而興其三湖書院內外亭閣暨小桃源等結構則關自巳酉以後記未及載岑撲軒與諸同志者搜羅佳勝品爲二十四景分題徵詩一時傳爲韻事夫洞中

嵌崑削壁飛湍懸磴奇險原出天然人巧既窮神
工益現雅人修士往往絃誦其中而斯洞遂爲西
樵之冠今院閣亭臺又廢爲榛莽觀者慨然鄧鑒
堂觀察宦成歸里亟欲振而復之首議擇其尤勝
處先建復書院及高士祠純陽亭以爲之倡招道
人有道者居守其地并贍其資藉俾之有舉莫廢
由是學舍吟壇亭園閣榭之屬皆可次第以興亨
與鄧巢閣茂才久有同心至形諸倡和觀察見而
和之卽欲藉是詩爲嚆矢巢閣與亨疊和再三以
推詳其意於時續和者聲相應焉亨因採西樵新

白雲洞志

自序

六

舊志所載白雲洞勝蹟名賢鴻章雅咏彙成一編
以便省覽更復廣爲搜羅加之採訪凡志未及載
者悉爲增入附諸劄牘遍播同人竊冀好奇嗜古
者展卷興懷樂捐輸以勸厥事且欲藉招詞客騷
人躡遊屐窮幽勝挹泉光山翠而吞吐之壩石罅
題爲斯洞更開生面斯亦名山之幸矣道光戊戌
冬十月里人黃亨書於羊城千頃書院

凡例

一白雲洞勝槩暨名賢傳記已畧載西樵志及遊覽記茲特爲拈出以便省覽縱才人逸士未經遊賞興到亦可寄題其繼關勝境時賢事蹟志未及載者悉爲增入俾前人韻事不至日久就湮

一增記洞中事蹟出自顯達之士固足爲名山生色其或布衣韋帶遯迹終身而其文采風流不可泯沒者尤當記載此亦發潛闡幽者所不容已也

一時賢於洞中有所闢建其人果可傳者卽爲立傳縱或無事可紀仍附記姓名爵里以識無忘

白雲洞志

凡例

一

一時賢於洞中或講學或肄業其人果有可傳者不拘名位顯晦槩爲立傳其事蹟傳聞未確或其人現在者自明經以上均記姓名爵里以俟將來

一續記傳畧旣不敢僭擬諸邑志亦不能倣照西樵遊覽記悉有所徵引隨所見聞有美必錄故體例不拘一律竊自比於筆談詩話之流但不敢妄加附會云爾

一遊蹤暫至未嘗久居此洞又無遺蹟畱存者雖屬名賢亦第採其詩不列傳畧仍於詩冊內記其梗槩至龐章二公其於斯洞會否僑居雖不可考然

當開闢伊始遺蹟彰彰膾炙人口自不當與暫遊者並論

一白雲洞題詠諸詩悉從遊覽記錄出間有遺漏者採馬志補入要亦不敢濫收至於時賢雅詠有爲白雲洞而作者更爲酌採別爲增輯一冊

一增輯白雲洞詩或出自本人集中或出自選本其詩業經行世其人或沒或存均得入選若其人已古詩集散亡從殘編賸稿中搜出苟有可存槩不敢沒

一時賢事蹟及遊詠篇章或有訪求未盡者陸續搜

白雲洞志

凡例

二

得編爲續補

一物產一類已備載舊志及遊覽記不能別其何者爲洞中所產故從其畧

一同志諸君子倡和佳什及遊覽之作未敢擅加掄選衆議另爲一編隨到隨刻

白雲洞志

目錄

第一冊

名勝

總論
臺石

圖考
古蹟

峯巒
亭院

出洞
續記附

溪泉

第二冊

傳畧

第三冊

藝文

文

增輯附

第四冊

藝文

詩

白雲洞志

目錄

一

第五冊

藝文

增輯詩

地契碑記附

白雲洞志

里人黃 亨嘉圃纂輯

邵鑒堂先生鑒定

門人盧維球菱石較輯

受業弟宜貴菊屏校刊

同訂諸先生

曾廣文 劍勉士

沈孝廉文煥卿雲

陳明經 愈師韓

鄧茂才 翔巢閣

黃孝廉 溥韓城

白雲洞志

目錄

白雲洞志第一冊

名勝

總論

天下大觀厥有五嶽嶺南名勝首稱二樵世之侈言探奇者謂必徧遊五嶽而後快區區羅浮西樵猶以爲所見未廣矧乃在一邱一壑予謂不然其人而果能遊如太史公向子平輩則可否則足跡雖徧天下詢其所至則約畧舉似凡宇宙間魁奇譎詭幽異曠邈足以極壯觀而激發氣志者茫乎其未有得曾不若棲邃巖宅盤谷嘯傲烟霞盪滌靈府者之領畧爲

白雲洞志

一冊

一

更真也昔人謂東樵岳壑溪泉不逮西樵遠甚而白雲一洞勝甲西樵其峯巒則有白雲長庚幡子華蓋芝丘獅嶺鳳岡其崑洞則有朝元觀音羅漢海屋若谷琴壑其溪泉則有大小雲瀑三湖雲溪其臺石則有披雲逍遙漱石香爐左右天門洗心眠雲醉翁菴蒼靈鼇渴馬闔闢雲坳其高可以眺其幽可以隱其曠可以遊其清可以澄懷而滌骨加以名流題詠亭臺點綴入其中者如遊洞天如探月窟幾不知有人間世矣彼壺中九華袖中東海會心處不在遠也安在斯洞之勝不可作五嶽遊乎

白雲洞圖

白雲洞志

一冊

二





白雲洞志

一冊

三

圖考

白雲洞 廣東通志在廣明洞前 南海縣志洞純石
 削壁凌空飛泉璀璨為山西絕勝洞口有白雲寺溪
 水澎湃聲聞里許 嶺海名勝記在白雲峯西麓由
 白雲寺入白雲溪水石多奇沿溪渡石橋屈折至洞
 口捫磴而登石墀平坦容數十人洞旁曲水逶迤可
 流杯層崖飛泉點滴如撲珠日光燭之璀璨奪目中
 峙一巨石曰洗心石左壁有石室厯石梯十餘級始
 至其上戶牖畢具中構石榻卧見飛泉洞外危橋崢
 嶸石林環帶殊極清勝嘉靖中何僉憲中行欲闢拓

以居未果隆慶間子亮始修而廓之萬厯中大學士
趙激陽志臯公卽洞前構亭曰雲瀑建橋曰滌心景
益增勝 西樵遊覽記圖說在廣朗洞之下山之西
麓也峭壁如削環列三面飛瀑數十仞劈崖而下喧
逐噴薄條盡塵囂瀑下有洗心石可躡而登石側幽
龕可坐而酌其中石埤平坦闢爲流觴曲水瀑勢灑
落如雨激石噌吰作聲壁左有石室捫級十餘世傳
何白雲先生讀書處也前俯厓際多前人名蹟摩挲
可誦洞口厯級而下飛橋跨焉石鐫天梯磴僅容足
一小峯曰華蓋巨石卓立左抱洞口亭亭秀出如張

白雲洞志

一冊

四

蓋然其峯下峭上平石闕飛磴峯半有橋踰橋有天
然石臺可卧以觀瀑環洞之前壘石爲臺址舊有雲
瀑亭下爲滌心橋萬厯中趙志臯所建也亭外溪水
瀦而爲湖非約不渡迤東石壁排空倒削丹紫紫蕊
輝映崖石絢如繡文壁之下有披雲臺奇石矗成清
溪側繞上極寬敞可列几筵臺石石削如扉一徑可
上其東又有逍遙臺欹峭更絕溪水東瀉而北折古
寺當谷口焉洞內采芝徑醉翁石皆爲勝覽西樵岳
洞今名最著此爲第一

峯巒

白雲峯 嶺海名勝記一名雞抱峯在長庚峯之北其
下峭壁多奇 峯最雄拔峭壁奇削石勢峻嶒苔蘚
繡錯蒼潤如屏大小雲瀑飛流兩腋丹翠交曜境絕
幽勝

長庚峯 南海縣志在火蓋峯北 嶺海名勝記曲折
延綿南麓一坵崛起純石而形覆釜是曰芝坵 峭
削與白雲峯埒有馬鞍嶺即芝坵也常產芝五色雲
覆之飛泉從峯半瀉下爲白水坑中分三級高三百
餘丈其麓有獅子嶺鳳皇岡又有華蓋峯左抱白雲
洞口一石秀拔形如張蓋其西巨石中劈如門今名

白雲洞志

一冊

五

左天門

幡子峯 嶺海名勝記峯勢飛動其徑如懸蛇然 在
象峯之北有象泉清流注於峯後宛折如龍前爲獅
子嶺西麓壘石疊起中通一徑名右天門

華蓋峯 高三十仞左抱洞口形如華蓋頂平可宴
岳洞 壑谷附

白雲岳 在雲瀑之左即白雲石室也一名朝元岳亦
曰純陽谷

觀音岳 南海縣志在白雲洞中可望不可陟 嶺海
名勝記石閣懸空壁間現一石室高丈餘金色熒煌

像類觀音山下望之儼然又名羅漢岳 岳為何白
雲先生讀書處石梯十餘級捫壁可上岳頂垂泉一
線涓滴不絕

羅漢洞

按山中有羅漢洞在廣朗洞下 今按在菡萏
今不知其處疑卽觀音岳也 石下

若谷

在華蓋峯東麓圓石平峙其下有岳深廣數尋

中列石案可布几筵澄泉泐流谷口滙爲小池清幽

絕勝

琴壑

在小雲泉之下深僅丈笏泉韻清冷中有石榻

宜鼓琴

內有石如鯉魚側卧逆
靠小瀑布水形象如生

海屋洞

在白雲溪之左巨石橫卧壩中下有石穴深

白雲洞志

一冊

六

不可測水從洞後噴出產異魚

溪泉

白雲瀑泉

南海縣志在白雲洞內飛泉璀璨奪目稱

山中絕勝

霍益芳山志瀑倒銀河珠璣滿目不可

端倪

嶺海名勝記卽大雲泉雪花飛湧態狀奇絕

喧豕震山聲聞數里

應潮湖

在白雲洞口瀑水潄爲湖盈縮應潮汐

小雲泉

嶺海名勝記源發白雲峯西北飛撲如雪合

流白雲溪

泉最清潔爲小瀑淙淙而下故名以別

於白雲飛瀑

白雲溪 南海縣志在白雲洞前 溪合大小雲瀑之
流有靈鼈石上爲釣鼈磯其水西注於東江入於樵
湖此樵西第
一條水也

臺石

香爐石 嶺海名勝記在白雲洞前高三十餘仞狀若
香爐下峭上平 石卽華蓋峯巔鼈石疊豎上平如
臺石側一徑猿援而上可登望

洗心石 嶺海名勝記在白雲洞內 在雲瀑之下歷
級而上可眺瀑源

眠雲石 在洗心石下

白雲洞志

一冊

七

醉翁石 在白雲洞口峭崖之左欹頽如醉人石上有
鐫刻

將軍石 在白雲洞湖口奇石架立雄偉如武人今

菡萏石 在華蓋峯下秀石矗峙數仞爭巧助奇如花

瓣層疊下臨應潮湖

披雲臺 嶺海名勝記在白雲洞滌心橋東臺依削壁
前瞰清谿南海何亮所築 臺東有石門削級而登
僅容一人其上寬平長竟十餘丈其下清流側注怪
石嶙峋境最幽敞

逍遙臺 嶺海名勝記在披雲臺東孤峭而奇高二十

餘仞 今名曝書臺依峭壁而出頂平可宴石磴穿崖而上險逼若懸梯

靈鼈石 在白雲溪口溪水分流外注石聳峙內向蹲若巨鼈雲溪之鎮石也

釣磯石 在白雲溪上兀峙如屏即釣鼈磯

闔闕石 在若谷之右雙石夾峙如門中為雲徑

古蹟

白雲洞 三字在雲瀑之右正書 龐弼唐書

龐弼唐銘 字徑九寸橫刻摩崖 龐弼唐銘 在洞壁連欸分十六行

白雲洞銘 白雲古洞誰哉闢始觀察何公嘉靖初

白雲洞志

一冊

八

紀子亮治之隆慶辛未剔幽發潛泉石之光崇德繼

志山高源長中憲龐子銘告四方 正書字徑四寸 雲南曲

靖府知府弼唐龐嵩撰 雲岳守者何元幹刻 旁刻摩崖

韋憲文詩 并序在洞壁

再遊白雲洞何君載酒於雲崖念白雲主人先友何

子明已逝 闕一字 舊讀書處 闕一字 雲室石梯 闕一字 梁屏

榻仍在而雲堂觀音像則新剏也悵然有感賦此

先友何子明會此著潛夫朝見白雲悅夕與白雲俱

子明不可作其人孔氏徒暇日追前遊風高清興孤

飛泉灑絕壁幽賞入蓬壺寺語遊樵者清樽宜此娛

佛自西方來人異教亦殊干載昌黎意語默與相孚

行書字 徑三寸 萬曆己卯菊月下澣白鷺洲韋憲文詩

外孫何元幹重刻旁刻俱

梁喬山詩在洞壁

陟彼白雲徑徑滿白雲時踐破白雲跡心與白雲期

陟彼白雲洞洞裏白雲迷跳出白雲外身與白雲齊

正書字 徑四寸 鍊橋主人梁嶠喬山氏艸旁刻

何白雲先生讀書處八字在觀音巖口正 孫元幹重

修五字旁刻

滌心橋字 在白雲洞湖口明大學士趙志皋建

白雲洞志 一冊 九

采芝徑三字在雲瀑右字徑三寸 徑在雲瀑下大學士趙志皋

題

仙跡二字在白雲石刻下字徑三寸

曲水流杯四字在流杯池字大二寸 流杯池為何子明所闢見嶺

海名勝記

天梯二字在雲磴左字徑五寸

醉翁石三字在石上

香爐石二字在華蓋峯上字高八寸半刻

將軍石三字在白雲洞湖口字高八寸今石已圮

海屋洞三字在白雲溪左

亭院 樓閣館舍附 寺并附

雲瀑亭 南海縣志在白雲洞口 嶺海名勝記亭為

趙志皋所建

吸雲亭 在白雲洞披雲臺上

清暉一覽亭 在雲瀑亭左俱何子明建

雲溪書院 在白雲洞口白雲溪之右 乾隆丁酉簡村堡廿七戶文會

捐貲鼎建有碑

龍從閣 在白雲洞左倚峭壁右帶飛流其基即雲瀑

亭故址 閣建於乾隆乙未越丙申初夏而成南海黃虞黎光等建

雲广山房 在白雲洞華蓋峯之下俯瞰湖濱後有攬

白雲洞志

一册

十

翠園石牀石几皆出天然頗幽賞可憇 乾隆丙申初夏順德劉子

秀建

環綺亭 在華蓋峯之半中關石室地僅容榻前眺瀑

源 南海關泰元建

玉樓 按今名攻玉樓 在白雲洞外披雲逍遙二臺之間 乾隆丁酉

南海石岡李氏建

沁心亭 在玉樓之右奇石屹立亭倚其上石側引泉

瀦為小池

光分亭 在逍遙臺上 俱李氏建

濂香書屋 在披雲臺上原建自娛軒後改嚮往居依

石壁為牆漸圯今改稱濂香

自圖考以下至此俱本西樵遊覽記今按雲瀑亭以下諸亭院

樓閣房舍並此
惟南溪書院存

白雲寶震寺

按馬志載霍太保毀寶震寺寺僧惠連乃

寶震寺時有神拂白雲歸古洞杖挑明月入烟霞之
句及居寶震又有詩云古木森陰可避喧半簷聊結
數苔垣因思白足常參謁貪看青山不掩門跌坐每
依芳草席倦遊懶上碧雲村自從粒米須彌破客至
難供菜滿盤其詩頗佳其事則劉
南畝力辨其誣詳見西樵遊覽記

續記以下未
經入志

三湖書院

在華蓋峯西北雲瀑從洞中流出為應潮

湖數折而下為鑑湖又其下為會龍湖是為三湖書

白雲洞志

一冊

七

院面臨鑑湖三湖環抱如襟帶故以為名

乾隆已酉
金甌堡紳

士岑懷瑾等建今圯有張
葯房太史撰書碑記今存

擁翠亭

在三湖書院北玉池南前面鑑湖後倚眠雲

夢月大石週遭高下雜蒔花卉四序皆春

有龔成松
碑記今圯

清暉閣

即擁翠亭上層與東西南三面諸峯並峙白

雲繚繞集人衣袂今並
圯

漱石臺

在翠擁亭左玉池前白雲深處門內高廣數

仞自下望之峯巒秀矗登其上則曠坦如平臺可以

坐卧日落風起披襟其間爽氣襲人

玉池

在擁翠亭左漱石臺後池水由應潮湖出枕流

亭轉石室後繞牆落巨石而涓滴下池如小瀑布狀
滌硯其處輒有文魚吸浪

雲坳石 在擁翠亭後大如屏障高過清暉閣與東獅
子嶺對峙旭日初升烟光欲活

鑑湖 在三湖書院前水由應潮湖數折遞至與小雲
泉滙合於此築堤以蓄其下流遂成巨湖形圓如鑑
故以為名亦取鑑形之義波瀾蕩漾蒲荇交加尤宜

月夜 鑑湖亦名中湖今洞

會龍湖 在鑑湖下流

柳堤 即鑑湖堤自東獅子嶺下至西第一洞天橫亘

白雲洞志

一册

七

數十丈為鑑湖畜水兩旁盛栽楊柳閒以雜花

湖心亭 在鑑湖中正對三湖書院

枕流亭 在應潮湖東當水流處 南海李孟廉等建今圯

小桃源 在小雲泉下土屋數椽引泉環遶其前捍以

竹籬遊踪罕到境幽絕 今廢

蘊玉書室 在小桃源西北前面鑑湖後倚獅子嶺與

白雲峯側界外遶雜花野樹葱蒨蔚斜陽返照光

景愈佳 順德龍山温愨園建南海簡村李吉林陳珮琚增葺今圯

兩儀石 在三湖書院前巨石中分如太極判為兩儀

中空隙地雜植榕柳木棉由此踰石橋即為釣磯石

雲門 在枕流亭西折而下兩石並峙如門戶然高可
二丈餘澗水逶迤赴湖高下相舂鏗訇可聽

渴馬飲泉石 在枕流亭邊

石壁 在白雲洞南壁立千仞如鬼斧神工削成峻峭
由枕流亭過濂香書室循石壁曲徑攀援而上書室
前有梅花至冬盛開如堆瓊綴玉

石室 在漱芳園中若谷崑上關鳳鳴題

丹井 在鑑湖南大石下第二洞天東井深尺許色清
味美至冬常溢相傳昔有人讀書洞中夜夢神人授
丹於井教飲此水可致長生

白雲洞志

一册

三

髣髴武陵 四字在洞口字徑二尺
岑懷瑾題摩崖

第一洞天 四字在柳堤西順德
黎簡書今圯

第二洞天 四字在鑑湖南丹井
西岑懷瑾書摩崖

第三洞天 四字在華蓋峯下石
字初公書摩崖

壁立千仞 四字在洞南石壁字徑
五尺字初公題摩崖

眠雲夢月 四字在擁翠亭後字徑二
尺許摩崖 岑懷瑾題

漱石臺 三字在臺畔
字徑尺摩崖

靈鼇石 三字在
石上

蝦蟆石 三字在
石上 石在鑑湖中

若谷 二字在谷口南海黎光
識順德黎簡書摩崖

南畬卧几

四字在雲厂後
華蓋峯麓摩崖

小桃源

三字在蘊玉書室後石壁
李萍之書字徑尺許摩崖

漱芳園

三字
摩崖

園在三湖書院後

陳錦堂文耀關丹山
鳳鳴關魯窩敏夫岑

允齋文藏劉南畬子秀岑蘊堂聯乾岑僕軒懷瑾余
詩如觀信陳蘭堂進陞陳雪堂廣緻關德卿日爲雲
卿日坎字初公暨先從伯勉堂公同結漱字
吟社因闕此園以爲吟壇有岑懷瑾碑記

白雲洞二十四景

鑑湖印月

華蓋觀瀑

即華蓋峯中有環
綺亭前眺瀑源

靈鼇吸波

即靈鼇石

清暉歛雲

即清暉閣

白雲洞志

一冊

函

擁翠評花

即擁翠亭

柳堤鶯囀

攻玉聽蟬

攻玉樓遊覽記作玉樓樓外
樹木交蔭夏秋間蟬聲不斷

漱石晚涼

即漱石臺

曲水流觴

巖巖候潮

巖巖閣遊覽記作
巖巖閣面應潮湖

若谷臨池

谷內石案平妥可作書
谷口池水清潔可滌硯

枕流鼓琴

即枕流亭

雲門聽泉

應潮浴鷺

即應潮湖

巖壑書聲

石壁探梅

兩儀垂釣 即兩儀石

玉池墨浪

逍遙長嘯 即逍遙臺

海屋滙流 即海屋洞為三湖泉流總滙處

琴壑蛩吟

蘊玉夕照 即蘊玉書室

古井流丹 即丹井亦名長生井

雲坳朝暉 即雲坳石

白雲洞志

一冊

去

以上二十四景前文並有記載間有前未及詐者畧為補註一二其詳現前文者不復贅列

張廣文喬年白雲洞誌遊吾粵山水之勝西樵甲于西南而白雲洞又其冠也迴溪疊壑異趣天成有圖說所不具狀諸誌所未及詳者予自嘉慶甲子後讀書其中徙席各館舍者數週歲月既深不可不為之記其地當西樵之西北洞曰白雲而有內外洞之別其取路于山東也初由天鎮峯側路轉出坳望中峯蒼鬱七松虬參天為雲溪書院藻芷流芬平疇湧綠西眺肇慶諸峯晴明畢現疏泉院側瀟為墨池鄉人土詩文會焉右比白雲寺左下海屋洞後抵會龍湖山坡夾束以受全洞之水右靈菴石最顯其間再登為鑑湖當外洞之腹楊柳奕李襟植隄址湖心有亭存帶參差水木明瑟每當秋月豁空山色樓臺倒影入湖上下天光俯仰無際湖東可通蘊玉書舍湖西為三湖書院書堂洞達花隱四時左出為漱石臺擁翠亭清暉閣墨池諸勝右旁為若谷巖古榕偃蓋穴注小泉清絲切耳巖內列石凡二三云古羽士隱此內通一路蜿蜒歷二十餘級忽瞰天光已遠後山矣土為漱芳園為眠雲夢月臺書院之麓也湖有路

公關兩扇榜曰第一洞天入門沿鑑湖湖盡為第二
洞天巨石三五崑崙成門幾疑人巧過此行萬木中
陰森修迴離披撐拄入第三洞天為應湖湖水消
長應潮也碧浸山根澄凝太古小舸撥霧而過龍從
閣臨之即古雲瀑亭前明趙志臯構始半山花雨一
角池臺水之奔也至此而靜景之放也至此款收林
之邃也此轉而日月開顏山光悅性予嘗于此偃息
四十閱月耳飽溪聲日飽林翠狙公索果木客談詩
落落黃唐難與人道關門一出山風水響圻地奔崩
為內洞口矣瀑花凌履淫翠沾裾兩石橋轉圻跨上
山骨透露石壁侵天匝其三面中坦二十餘丈所踐
皆石無寸土硤硤參差可皮可几琴薦書床天然位
置飛瀑從石角三疊破空而下鏗轟噴薄真巨靈手
盪脚踏開而為兩也支泉鑿澗曲可流盃沿流佈坐
視盃注得酒雅趣自然洞口既空華蓋外補之環
綺亭屹立峯腰可以觀瀑其復由應湖湖登崖而東
也湖水落處有亭曰枕流上轉為披雲臺乃外洞最
高處峭壁當四山正幅上鑄壁立于仞四大字徑三
尺餘蒼松拔地凌霄豁襟臺上可誦唐人絕頂人來
少松高鶴不羣之句外望烟村綠畝如讀黃鶴山樵

白雲洞志

一册

六

畫本東下為攻玉樓圍綠天中炎歎不到樓右石崖
露小窠蓑衣拾級摩背刮面屈佶上躋為逍遙臺倚
下幾百尋臺上石几茶竈粗具每于臺外以飛索挽
銖鐺酒棹二三蘭友歡罄鏘鏘然長嘯聲滿巖谷
北下有長生井由是路轉東南簷管夾徑猨雲委地
忽而初暗花明為蘊玉書舍其地三面環山別開一
谷築室松下前瀟水為半壁池所謂半潭秋水一房
山者脫巾獨步披書坐花天老幽閑人間何代後則
漱玉丁丁寒流咽嶼石榜其上曰小桃源即古之小
雲泉也登之內一大壑林莽蕭蕭古樹石盤踞其中
蒼茫佇足但見蝙蝠啁啾寒風悚人殆人迹罕曾到
者出菴玉可抵鑑湖與前徑合凡三湖豎諸館閣臺
榭皆在外洞其內洞則水石之窟也洞有可望不可
至者一日巨口巖出洞可見入內則不見一日采芝
徑在內洞懸崖間草痕一線梯板無自云呂仙采芝
于此尚留石跡今石戶祀之有可至而不可盡者曰
海屋洞石窠于地底內產鮮鱗秉燭而遊莫竟斯奧
有可至而人罕至者曰小桃源前叙明矣

白雲洞志第二冊

傳畧

何中行 弼唐存稿中行號東江南海人嘉靖壬辰進士
士歷官廣西僉憲家食時雅志邱壑愛白雲洞之勝
時攜書遊息其中因闢洞門子亮字子明少遊邑庠
不樂仕進遂架石鑿險芟除荒穢以久居焉亮性閑
恬貫通典籍砥勵名節人甚重之 廣東通志中行
字梓甫順德人南海籍

何亮 嶺南詩海亮字子明番禺人萬曆壬子舉人父
僉憲中行愛西樵白雲洞之勝欲拓以居未果亮不

白雲洞志

二冊

一

樂仕進始修而廓之架石鑿險讀書其中貫通典籍
砥勵名節鄉人重之望像於洞中祀焉著有白雲洞

集 廣東通志選舉萬曆壬子科鄉薦亮字子明一

字景愷番禺人

按亮實西樵坑邊鄉人其族孫何文
學元榮述其家乘所載亮父中行科

第官階與諸志同謂原籍順德葛岸良教鄉遷居西
樵龍津堡坑邊鄉亦與省志中行籍貫畧符惟載亮
止邵庠生與省志異夫父子異籍省志何不注明亮
為中行子愚竊疑登王子鄉薦之何亮番禺別有其
人隨查番禺縣志選舉亮字子明著有白雲洞集則
固混而一之然使亮果登科其子孫何以無知之者
據龐弼唐記亮重開白雲洞事在隆慶辛未時亮已
泮遊至萬曆壬子距四十餘年年逾六十矣以不樂
仕進之人至老而猶逐逐舉場以博取科名此必無
之事要亮之高節至今噴噴稱白雲先生與斯洞
同其不朽正不必以科名之有無為輕重耳 又按
何氏家乘公性至孝父歿塋西樵紗帽岡公于白雲

洞中設像奉事以致哀慕今觀洞中石巖之像仙裝鶴馭愈以為即白雲先生其像為後人所塑理或然也或因巖以純陽名故又目為呂仙云

龐嵩 明史本傳嵩字振鄉南海人嘉靖十三年舉於鄉講業羅浮山從遊者雲集通判應天進治中尋長刑曹終曲靖知府皆有政聲早從王守仁遊淹通五經其在南京集諸生新泉書院相與講習罷官後復從湛若水遊久之卒 廣東通志嵩歸從湛若水遊聞隨處體認天理之旨若水沒學者翕然宗之晚年築室西樵大科峯下以棲息焉食不兼味世多其清苦 理學名臣傳嵩歸遊於甘泉之門詣日益精甘

白雲洞志

二册

二

泉謂北有涇野南有彌唐江門之緒不墜矣時有疑王為遺外湛為遺內者嵩折衷之曰知之良者即天理也隨處體認者即致之云也吾人有志從事致良知驗之不學不慮即不肯甘泉之旨從事體認天理承之勿助勿忘即不肯陽明之旨其論學與義多前人所未發云 按何中行闢洞欲居而未果嵩勸其子亮重加修治為書白雲洞三字記其事而銘諸壁則斯洞之謂嵩實與有力焉

趙志臯 明史本傳志臯字汝遠蘭谿人隆慶二年進士及第授編修進侍講以京察出為廣東副使居三年再謫官旋起太僕祭酒擢侍郎以禮書兼東閣大

學士卒贈太傅諡文懿 嶺海名勝記志臯嘗偕劉
廉憲遊西樵於白雲洞口建雲瀑亭又為橋跨絕磧
中以便遊侶

韋憲文 順德縣志憲文字純顯鷺洲人弱冠卽領鄉
薦工詩賦久之以爲非安身正鵠遂研精理學由司
訓擢國子助教著居敬正義諸書期諸士爲有用之
學憲官同知提舉遂拂衣歸日與門人發明正修之
旨往還西樵天關與葉絢齋霍勉齋書札皆透徹宗
旨臨川湯若士高明區羅陽深相契納其學派自江
門而叅之餘姚以豐城爲宗著書數百卷皆以闡明

白雲洞志

二冊

三

理學之要云並入省志 按憲文與何亮友善數相
往來亮沒憲文重遊白雲洞感舊賦詩
石刻
猶存

以上本西樵遊覽記增修以下續記

劉上舍子秀 先大父爲撰墓誌其畧云君諱子秀字
振天一字南畬順德龍江鄉人賦性淵靜少而嗜學
乾隆丙申丁酉間與余同掩關於白雲書屋君日尋
聖賢道味旁搜古名儒書籍一切塵務度外置之未
嘗不應試文不見售澹如也其人品與古爲徒學必
窮源不求時好余心欽服之以故訂交最淡而永所
著有易註二卷南畬詩集一帙其西樵遊覽記業已

梓行人爭購之以為珍秘內泰劉氏世譜序語亦先大父撰亭按南畝為人寬厚嘗有賊踰其垣圖竊候墜地傷足南畝見而惻然療之以藥給子數金戒而釋之聞者感嘆後夜行遇盜將奪之衣物有識之者曰此劉振天先生也遂舍之而去其感服于人如此所居白雲書屋即雲厰山房結漱芳吟社惜詩集易註未果刻今佚

黎處士光 字初公乞同人展黎子墓議黎子諱光字拔朝號萃堂南海沙頭人工於畫能詩兼善雙鉤有山水癖於乾隆乙未十月偕關魯窩邀子購白雲故址闢荆棘尋幽勝創建龍從閣等書屋工甫就而黎子忽逝時子幼妻弱魯窩於其靈前卜地問以白雲洞口白雲寺之右許焉今其子亡無後龍從閣久已

白雲洞志

二冊

四

公之士類凡到潛修者遇清明日祈為黎子壠上壓紙雖不能如雲路口之為李子長立祀亦見重闢此

山者之賴有其人亭按萃堂墓題詠甚夥聞其墓誌亦亭初公撰今秋訪諸其墓則已遭毀變求其詩集亦已散亡猶幸西樵遊覽記及詩海嶺南鼓吹諸選本存其教首是萃堂之墓雖毀萃堂之名不終毀矣 關處士敏夫字泰元一字魯窩南海人

能琴喜吟詠酷愛白雲洞岳泉之勝既與同志倡議買山闢建龍從閣又獨築環綺亭於華蓋峯腰抱琴觀瀑繪入畫圖謂白雲瀑布高不及匡廬而曲折勝之其棲息洞中為最久岑璞軒闢漱芳園魯窩實贊成之

陳廣文文耀字炳華一字錦堂南海人少能詩家素貧
養親以吟詠承色笑乾隆甲午舉鄉試第三人主司
王九華李雨村大加獎異許以翰苑才三上春官不
第以大挑二等選開平教諭卒於官爲人利氣可親
而內守極嚴處鄉鄰排難解紛靡不欽服常言吾於
藥物中最惡甘草謂其性隨物轉和而不介也其人
品槩可想見嘗講學三湖書院結漱芳吟社著有錦
堂詩鈔

李孝廉掄才字本毓一字容門南海人

欽賜嘉慶

甲子科舉人生平善草書雅愛閑靜不涉俗務居常

白雲洞志

二冊

五

手甕澆花臨池展帖興到則爲山水遊乾隆乙未歲
聞 孚初公與黎萃堂關魯窩欲重闢白雲洞有醪
金建閣之約欣然署名爲事首其高懷逸致亦可窺
見一斑

岑文學懷瑾字壯忠一字璞軒南海人諸生爲人慷慨
知義卹孤寡賑貧乏造橋梁修道路立義倉助農功
睦鄉鄰敦友誼遠邇稱道者無異詞有應世才而雅
志邱壑嘗於白雲洞中築三湖建書院倡結漱芳吟
社日與諸吟朋搜羅佳勝未著名者品而出之剔幽
發潛推陳出新點綴林泉勝如圖畫實璞軒之力居

多常與張葯房黎二樵遊故當時洞中院舍多二公
筆跡今雖廢爲荒壤而訪斯洞者猶往往追念璞軒
云

余處士迪名觀信字迪朝一字藹如南海人貌古拙有
善書名少學書常以重物綴腕間提筆運之以蓄腕
力故其書法迥超凡近兼喜吟詠結漱芳詩社每作
書自署曰漱芳余迪所書樵西石路碑記瘦勁古秀
神氣飛動得右軍筆訣今碑尚存藹如嘗于旅次遇
盜他無所顧獨堅
持其所習用筆一束于袖間他日語人曰
吾特恐其奪吾筆耳風趣何減趙孟堅

余文學鴻翰字相察一字孺如少好讀書家貧不能自

白雲洞志

二冊

六

給爲趙文學勉采執爨趙晨夕講學孺如從旁竊聽
趙察知其故詰以講義輒能隅反命題試之文字卓
有可觀乃別雇執爨者使與門人並習功課自是益
苦志研求學日以進未幾以歲試縣案首選補郡弟
子員旋以優等補增生學行爲時所重晚年講學三
湖書院誨人有方從遊者衆洗孝廉文煥乃當時及
門受業者自謂居名山中服名師訓生平得力多在
於此至今猶惓惓不忘云

張孝廉士昌字時周一字毅齋順德人少能文與族人
葯房太史玉洲孝廉俱受知於學使翁覃溪後雖屢

困場屋而好學不倦敦尚名檢誘掖後進數十年如
一日在白雲洞龍從閣講學有年及門者多知名士
嘉慶庚午 欽賜副貢癸酉 賜舉人壽八十
餘歲子謙一字六皆早登辛酉鄉薦及門如蔡孝廉
鳳顯李孝廉朝相蔡孝廉湘皆當時受業洞中者
蔡明府超羣字雲驥一字遜之順德人少負文名下筆
立就乾隆甲寅年甫弱冠隨從兄茂才英士讀書白
雲洞龍從閣是歲補邑弟子員聯捷鄉試嘉慶辛酉
成進士選河南滑縣知縣轉補柘城未幾丁內艱歸
遂不復出性疎脫不羈陶情於酒有兼人量好吟咏
白雲洞志 二冊 七

晚尤喜作草書求者輒應雖居官不久未及展用胸
中靡所蒂芥惟自稱百日縣令顏諸印章其生平曠
達大都類此

崔廣文振鼇以字行一字靈洲南海人少聰慧能文未
弱冠嘗與數千人會課奪其標尤工吟咏受業於周
文學健堂師弟並以禪山八景詩著名又喜摹東坡
書法性曠逸前後棲息白雲洞中者久之旋以廩貢
生就教職厯署連山訓導樂會教諭未幾歸卒於家
著有靈洲詩草

崔中書槐 南海縣志槐字植庭沙頭堡人爲諸生試

輒冠其曹偶嘉慶庚申舉貢士四上春官成己已進
士授內閣中書充文淵閣檢校母憂去職授徒羊城
從之遊者數百人槐孝友篤實教人以立誠爲宗嘗
屬門弟子曰與其從師逐隊過日不如二三知己屏
跡相切劘之爲愈生平酷嗜書畫蓄唐宋元明人真
蹟甚富居恒無事展玩至夜分不輟京師士大夫往
來尚聲氣槐在都高簡沉默公餘閉門著述客至寒
暄外常移時不交一語至論文及辨證書畫則疊疊
終日丙子起復供職戊寅分校順天鄉闈得士如額
而疾作未揭曉卒年五十五著四書義易義最精核

白雲洞志

二冊

八

欲授梓人不果

按中翰一字蔭亭乾隆壬子
癸丑間嘗讀書于白雲洞

邱文學士超字秀楠一字與凡順德人諸生家富典籍
不喜交遊泰稽博覽晤對古人自以爲至樂少年以
文翰受知中翰馬嶸山常於士大夫前嘖嘖稱道謂
四六能運真氣於排偶中可以獨當一面而典籍之
遺忘者足相資也嶸山去而與凡遂杜門不出倫常
模楷
區吏部仁嘗掩關白雲書室題詠甚夥又與張王峯
區序語譚碩卿何百原何冀階陳苧邨輩結雲礪詩社情耽
著述不事生產以此致貧亦不自恤據晚香圃
吟稿泰修著有
稽古質疑晚香圃吟稿少有信芳館集馬嶸山采人

嶺海遊囊中又嘗摭拾子史嘉言懿行爲倫常模楷百六十卷韓桂船中丞序之此著述之尤關於世道

人心者

嶺海詩鈔

蔡廣文鳳顯字瑞遠一字儀廷順德人幼聰慧能文在白雲洞龍從閣從張毅齋孝廉遊年十六補郡弟子員踰歲補廩領嘉慶庚午鄉薦大挑二等以教職用未赴選卒於家生平好學敦行取與不苟而性醇和與人無競見者靡不欽愛卒年五十有一簡孝廉夢巖作傷逝篇以哭之有句云文章老更成詩律工逾細儀廷之學亦有定評矣

白雲洞志

二冊

九

張廣文琳字逸芳一字玉峯順德人性嗜學砥礪志節少與俗諧獨好遊覽山水否則杜門却掃枕藉典籍或招良朋相與討論獻歌以爲樂嘗於白雲洞築屏書軒偕諸弟讀書其中題詠殆遍以廩貢生就教職歷署德慶饒平潮州訓導歸里後復與譚頌卿邱與凡何百原何蕢階陳芴邨輩結雲礪詩社吟詠無虛日俗問往來雖親知罕得見者所著有玉峯詩鈔據集及李士楨序語泰修 又按劉南畚雲山房亦名蔡照雲 玉峯修而居之但西樵遊覽記作 玉峯詩鈔作 音義畧殊要皆名與地稱

李文學吉林字藹標一字龍門南海人諸生因溫慰園

所闢建蘊玉山房與陳上舍講亭名珮瑀字秉寬旁加葺治

鑿池引泉鋤雲移石藩其餘地自成別一洞天因名

之曰小桃源相與幽居考業未幾講亭沒龍門講學

其中者數十年閉關謝客非其人輒不得入甫入門

有覺道二字顏諸石壁寄託甚高張廣文喬年梁孝

廉策書嘗從受業於此 李上舍允發緝熙等居樵

東石岡鄉嘗建攻玉樓於逍遙臺畔閣道可通登眺

稱快西樵遊覽記所謂石岡李氏即其人也

郭孝廉慶標字為璋一字幟城南海人少嘗肄業白雲

洞曾廣文勉士為言其少年篤學強記日有所習夜

白雲洞志

二册

十

雖就寢猶暗繹之或有遺忘輒舉燭檢看往往徹曉

不寐其苦志若此嘉慶己卯舉於鄉講學羊城從遊

者甚眾年四十餘卒

陳明經藩字作屏順德附貢生嘗肄業龍從閣時閣浸

就頽廢嘉慶辛未黎文學六吉貳尹莘農捐貲修葺

癸酉作屏重加潤色前有應湖湖口隄基寬淺瀑

泉一注瀉盡嘗加工培築以蓄湖水環湖多植花竹

洞中風景賴以一新六吉名謙光順德諸生莘農名民戴縣丞六吉從弟

并將寓學洞中其事蹟訪聞未悉或其人現存者

附列於左自歲以上並載

洗廣文喬 字應喬南海人乾隆壬申副貢官樂會教諭嘗肄業洞中

陳明經大臨 字翔仕一字信谷南海人乾隆戊子副貢嘗肄業洞中

龐孝廉錫澍 字澤昌南海石碓鄉人乾隆庚寅舉人為字初公同年友乙未重闢白雲洞釀金

築室並首其事亦嘗棲息洞中者

潘孝廉宜佳 字伯衍南海人嘉慶庚申舉人先後肄業龍從閣三湖書院

周明經聲顯 一字虛谷順德人嘉慶辛酉副貢嘗肄業龍從閣

陳明經毓芳 字節那南海人嘉慶壬申歲貢嘗肄業洞中

陸孝廉士楷 字偉仁一字端林三水人嘉慶癸酉舉人為諸生時嘗肄業龍從閣

傅廣文鵬翀 字翔光一字培風南海人嘉慶丙子舉人現官英德教諭嘗肄業洞中

張廣文喬年 字錫蕃一字連嶽南海人嘉慶丙子舉人官茂名教諭嘗肄業韞玉山房龍從閣

白雲洞志

蔡孝廉廉湘 字萃鴻一字雲笠順德人嘉慶戊寅舉人嘗肄業龍從閣

洗孝廉文煥 字靈秀一字卿雲南海人嘉慶己卯舉人嘗肄業三湖書院

李孝廉朝相 字佐堯一字斗南順德人嘉慶己卯舉人嘗肄業龍從閣

梁孝廉策書 字靜章一字文笏南海人道光辛巳舉人嘗肄業韞玉山房

黃孝廉之冕 一字樵房順德人道光辛巳舉人少隨從父悅桐肄業攻玉樓

陳廣文湯鑿 字榮植一字敬堂南海人嘉慶丙辰 恩貢官長樂教諭嘗肄業洞中 以下續補

陳廣文韶 字秉端一字虞階南海人嘉慶戊寅舉人官文昌訓導調昌化教諭嘗肄業韞玉山房

吳刺史梯 字雲川一字秋航順德人嘉慶辛酉解元恩宰山東蒙陰濰禹城遷膠州轉濟甯著有岱雲編嘗寓居三湖書院龍從閣

以下已亥再續補

郭孝廉懋勳 字寬仁一字銘鼎南海人道光壬午舉人嘗肄業洞中

黃大令虞字翀漢一字孚初南海沙頭堡人性恬雅少讀書西樵白雲洞中一切名利泊如也乾隆庚寅舉於鄉與黎萃堂等建龍巖閣閉關考業旋以大挑分發直隸補甯津縣知縣聽獄廉慎民愛之居六年以報兩忤大吏意去民訛言爲虧空故則釀金走省垣助之值大令謁布政使既入署民仝集堂下大呼還我父母司閹呵之不能止聲益震布政使聞命大令諭曰大吏非罪我我今還縣矣則皆踴躍歡慶且進大令金大令却之不聽皆委之去大令乃藉以助保定城工計三千金及還縣民焚香迎大吏廉知其賢將擢遷然非其好也未

白雲洞志

二册

十一

幾告歸愛白雲洞之勝復與岑璞軒陳錦堂輩於漱芳

園結吟社優游林下者三十年年九十三卒

從曾廣文勉士面城

樓文存錄出

後學鄧士憲填諱

先大父宦蹟已具載邑志茲篇舉其大要而於白雲洞故事特詳同訂諸君謂當登之傳畧既承公論不敢避嫌因祇錄付梓孫亨謹識

續補

吳孝廉維彰字顯庸一字晦亭順德人自幼奇窮脫畧形骸篤志勵學嘗偕族姪秋航刺史肄業洞中年五十餘登嘉慶丁卯鄉薦生平尤肆力於詩所造深邃著有古人今我齋集沒後門人梁廣文廷枏梓而行之秋航刺史復鏤板於山左并叙其終身窮苦而以其名爲造物之所忌雖有慨乎其言而其詩之可傳亦槩可見李文學孟廉字萼舒一字介亭南海人容門先生之長子也早歲泮遊補郡增生十赴鄉闈不遇遂絕意進取家居授徒裁成後進庭訓綦嚴排難解紛尤見重於鄉

白雲洞志

二册

三

黨生平性愛山水老而不倦乾隆己酉講學於龍從閣創建枕流亭迨後洞中亭閣日就傾圮每諄囑後人建復以無忘祖父之志且令設法防衛俾肄業者得以安居爲久遠計長子宗簡一字文川嘉慶癸酉副貢生邇因同人重修斯洞鼎力勸捐慨然以繼志紹徽爲己任不敢告勞諸工多所成就知者謂厥考之靈默誘其衷云

白雲洞志第三冊

藝文 增輯附

龐 嵩 見傳畧

重開白雲洞記

從舊志錄出

樵山廣明坪之前有峯迤出巍聳俯瞰東西二江曰白雲峯峯之領岳竅三洞若神闕菴宇曰白雲洞環石峭立若爐若几若昉若禽跂而翼獸奔而伏吞吐烟靄奇怪萬狀中磅飛泉從頂下漱如噴珠披散如懸簾蠅蜒如垂虹注前爲池瀾瀾穿石間而出先是東江何先生家食時雅志茲洞時攜書游息其中旣而繫身朝紱不

白雲洞志

三冊

忘邱壑之想已築洞門餘未就緒其子亮泮遊奮修歲僅一再至頗成褊塞隆慶辛未暮春予遊蹤始至攀緣而升徜徉日昃不忍去顧亮謂曰是洞當甲樵之諸勝天下岳洞若是者亦不多得顧險峻涓溜非梯挽不可陟盍稍修治躡級與遊觀者共乎亮慨然曰吾責也卽募工滌污芟蕪濬淤架壑鑿險階滑流觴有池偃息有次泡溜有所遊觀至者恍履天梯而探桃源跨鵲橋覓支機於天孫之渚矣仲夏以成功告予聞而喜曰志承先者孝也亟趨事者勇也擴大觀而公之有眾仁也一舉而三善備矣遂往觀之二三子相與剝荔浮瓜據石

面泉而酌葛爽時襲四壁廣寒真若故人滿座不必赤足而席地皆層水矣嵩素恬冷遇涼境默有所契因爲大書白雲洞三字并識於石以俟來者先生諱中行壬辰進士歷官廣西僉憲三子卽亮襄袞皆識趣超越繼志當有大者銘曰白雲古洞誰哉闢始觀察何公嘉靖初紀子亮治之隆慶辛未剔幽發潛泉石之光崇德繼志山高源長中憲龐子銘告四方

黃虞

見傳畧

鄧士憲填諱

重關西樵白雲古洞引

以下新增

粵中西樵一山與東樵爭勝者指不勝屈而幽淡雅逸

白雲洞志

三册

二

景况天然尤以白雲一洞爲最間嘗遊息其間見絕壁撐天環拱欲拜少西而南則飛瀑千仞勢若決河有大石當衝水乃盤曲而出下結石塊平滑開廣坐可十數人旁引曲水沿石流杯遊者輒憩於此左則壁梯尋上中有雲龕卽前明何白雲先生讀書處也面斯龕者壁仍榜開多刻前朝諸名輩紀遊詩摩挲可誦少出接一小橋名曰滌心橋下水聲湍激清越以幽旁有曠地將畝可因而臺焉相傳爲雲瀑亭故址側聳層崖峭甚好事者欲窮瀑源輒攀藤躡石巖巖而達洞頂頂有獅巖崆峒窈冥不能窮其所止臺邊溪水右折前數十步

半畝停湖劃然有仙凡之界外人至此幾疑絕壑非舟
不能到也湖之東削壁萬仞壁下陡起平地迤邐而右
屹然闕一石開駕橋於湖則東西相接皆紅塵飛不到
者洞以外則樹木葱蘢溪徑繚曲莫可名狀層波而下
復有大小湖者數溪口有寺顏曰白雲傍林爲蓋或亦
藉斯洞而得名歟至於雲歸林靜鶴淚山幽寺磬泉聲
日相響答其佳趣姑不具述惟是形勝今雖如故而設
色未加不有逸士幽人爲之點綴鋪張終仍古寂何以
補天工所未及乎爰求同志者相期闢荆棘鑿幽險或
獨結一龕顏爲某氏居或共葺一院聯爲樂羣所匪特

白雲洞志

三册

三

斯洞之幽致益增堪與羅浮仙樂洞絜勝卽湛霍諸先
哲之創建於樵山中者不啻後先輝映矣余時集同人
遨遊吟興適寺僧持此意請於余余輩遂欣然繪圖而
并爲之序乾隆乙未冬十月

乾隆甲辰水災先大父
舊作悉被淹沒茲篇從收

麓中檢出蠹蝕半殘字猶未滅意
其精神猶在斯洞間也孫亨謹識

張錦芳

字燦夫一字蔚房順德人乾隆庚子鄉
試第一人登己酉進士官翰林院編修

創建白雲洞三湖書院碑記

寓內名山巨嶽其湮嵐變幻巖谷崇深足以盪滌昏懷
而開發神智士之潛心大業者多建書院爲遊息地而
南海之西樵舊址尤多若六科雲谷建於湛文簡四峯

建於霍文敏石泉建於方文襄迄今過客猶識其處而山之北向所未有而今增築者則爲白雲洞之三湖書院洞有大小瀑泉下流匯而爲湖者三日應潮湖曰鑑湖曰會龍湖岑君璞軒與二三同志名之因以名其書院者也書院枕峯面湖空明爽塏樵北諸勝盡在几席經始己酉夏月而斷手於冬至辛亥乃屬子爲之記子謂璞軒曰君亦知今之書院與古異乎古之爲書院也以講學所談者心性所重者實踐其流也或脫畧書冊直趨本源皆謂之理學今之書院也以談藝穿穴經傳辨正文體期於以文載道是謂辭章之學爲理學者約

白雲洞志

二冊

四

而求之靜而悟之可以不出戶而闢道妙爲辭章者聞見必廣考據必繁非遊大邑通都博綜乎當世賢豪之所撰述無以考其源流而正其得失此其所以同而異也璞軒曰然然則何如曰是有道焉古之通經者有經師學官弟子而外大儒宿學皆以顯門之業相付授而居山者尤不可無師故教授曰山長元仁宗賜下第舉人並授山長則得師其要也古之奇書多藏名山羣玉之山有策府河北石室大小二酉中多積卷瑯嬛福地則列代之史萬國之志玉京紫微諸秘籍盡充物其中則藏書又其要也書院之大者列朝皆有賜書今誠能

仿其意以鳩集圖籍分類藏弄使居於是者日晤對古
人不自安於孤陋又得一二績學多聞之士爲之師相
與折衷異同申暢疑滯由文辭以幾於道如沿波而得
源安見深山幽谷遂不如大邑通都之殫見洽聞乎哉
嘗觀於湖有千尋界壁之雲瀑裕其不竭之源而後能
滌洄渟蓄以成淪瀾之觀否則行潦耳蹄涔耳烏覩所
謂澄之不清滄之不濁者今諸君既能選勝地構堂宇
爲居業之所吾願勿以流連光景爲娛而更思所以殖
其學將見人材輩出彼湖光山色之所盪滌而濬發者
且不知其然而然矣岑君曰善遂書以爲記乾隆五十
白雲洞志

三冊

五

六年太歲辛亥十二月朔

龔成松

南海人

清暉閣擁翠亭記

畫品固有三趣寫神爲天趣寫生爲人趣形似爲物趣
山亦有之奇幻不可名狀如有神工是爲天趣古蹟不
可摩滅如常生活是爲人趣取象不可移易確有形似
是爲物趣三者之外又有天然之人事物材則合三趣
而一之也璞軒岑丈爲吾世交前輩在城共事日久歲
已酉適因其鄉旋而往造焉隨之游樵時方與諸前輩
樂從事於三湖書院見其審曲面勢因地制宜已有古

今名畫所不能到者偶指雲行花放之處將建亭閣予
心喜之竊欲獨任諸前輩不余拒也遂庀材爲亭卽於
亭上建閣復就亭外隙地鑿池池北爲小迴廊可置茶
竈以待遊者閣曰清暉可以欸雲亭曰擁翠可以評花
是豈區區土木之力哉亦山之奇趣使然也且夫山有
亭閣猶人有衣冠也今使居下流而欲建閣以欸雲入
不毛而欲構亭以評花固不可得卽於湫隘囂塵之地
磊石爲山環以亭閣冒以美名此如優孟衣冠實則不
稱其服耳書曰地平天成稱也諸前輩以爲然爰承命
而勒之石

白雲洞志

三册

六

岑懷瑾見傳畧

漱芳園記

詩家吟詠有謂無窮出清新者有謂妙手偶得之者卽
以此園證之曩因創建三湖書院搜羅佳勝增爲二十
四景分題徵詩若無遺矣今春偶偕關魯窩丹山諸君
乘興探幽又得左右天門佳勝奇幻已極遂由若谷巖
中盤曲以登上出谷口見巨石峙焉將刻題詠魯窩謂
可摩勒園名結廬於上種梨百株梅數十本而園成矣
是無窮者真無盡而偶得者誠偶得也且夫人之際會
固各有數地亦宜然瑾自少時與同鄉錫堂丹山迪朝

諸君以十人之同心漱六藝之芳潤共聯詩社名以漱
芳互收推敲之益贖金合爲社本分用收息以供盤餐
燭茗之需後雖境遇不同聚散無定仍欲構漱芳園以
爲吟壇遍求地之雅靜有山水花木可以悅性怡情不
假人力自成天趣畧加點綴卽爲名園者積數十年而
不可得迄歲己酉建此書院爲闔堡鄉塾固宜先公後
私旣捐社本以勸公用今書院文閣湖堤諸要務次第
告竣惟漱芳園始志未逮回憶唱和之歡幾成曠舉繼
又得黃孚初關魯窩劉南畚黃勉堂諸君入社砥礪切
磋更多集益以山之靈諸君之誠瑾心之專默相感召

白雲洞志

三冊

七

故向時所思雅靜之地可以悅性怡情自成天趣卽爲
名園者忽不求而得之也此園怪石錯布如仰如企如
揖如降石室居中若谷居下闔闔卧木列東南眠雲夢
月屹西北澗水左繞於擁翠亭而入玉池右環於若谷
巖而入若谷池同歸鑑湖因爲闢治構植嘉卉將來繁
盛則山深林密固寧靜致遠之攸居木實竹萌亦澹薄
明志所取給惟願同社後人共體此志守山讀書樂道
尚義視吟壇之鼓吹如一家之埴篔將見砥礪有成和
其聲以鳴 國家之盛亦自此始矣昔柳柳州作始得
西山記自謂無遠不到而未始知西山之恠特因坐法

華西亭望西山始指異之遂窮高而游然後知向者未始游游於是乎始謹於此園亦述向之所遺今之所得以喻社詩妙手偶得之趣且以見造化之無盡藏也謹鐫社友芳名及社規花果於石

會

釗字敏修一字勉士南海人道光乙酉拔貢生現官合浦教諭著有虞氏易義義毛鄭詩異同辨周官小學廣東金石錄面城樓文存等書

重建西樵山白雲洞齋舍引

西樵山昔賢講學處也其巖洞之勝曰噴玉曰漱玉曰九龍曰觀翠曰白雲然噴玉九龍在山半觀翠在山巔皆拔地干仞登陟難之漱玉雖在山麓而峭壁屹立穴

白雲洞志

三冊

八

壁爲巖磴道斷續泉被苔滑人跡絕罕蓋亦以到難爲勝者也憶余十八九歲時訪白雲洞洞在廣明之西麓陂陀而平溪水東瀉北折沿溪而入兩石削立如扉斯闢一徑可上左有泉脉步杓右跨履石爲地廣濶百筵環峯爲壁鑿石引泉流觴坐適如居於堂皇如遊於園池不自知其山僻也且嘗舉以喻學今夫嶄然而高不若中行之翔翺也窅然而幽不若寬平之憩休也強達而弱廢不若卑邇之予人同邁也升援而降惕不若坦夷之予人不踏也由是觀之噴玉諸巖洞高則高矣幽則幽矣豈若白雲之奧如曠如抑如伉如其局量爲尤

大哉明何白雲先生實闢斯洞

國朝乾隆間重葺治之建閣瀕湖遊者極盛嘉慶以還稍頽廢且茅塞矣今夏鄧觀察鑒堂文學巢閣洗孝廉卿雲黃孝廉嘉圃諸君欲倡復舊觀問諗於余余惟裘之珍者非一腋所能成事之美者非數人所可擅烏知夫遊於噴玉九龍觀翠者不自覺其履高身危而翻然樂於卑邇之域乎又烏知夫遊於漱玉者不自覺其縊幽冒險而翻然歸於坦夷之界乎居易以俟不爲苟難是誠講學之要旨也今者噴玉觀翠齋舍奐然而白雲洞猶未議及非缺事歟皆曰然爰書以諗同志者道光

白雲洞志

三冊

九

戊戌夏五月

白雲洞志第四冊

藝文 詩俱從新舊志錄出

廬 嵩 見前

偕戴郡侯遊白雲洞

峭壁開靈洞春山策杖隨花光霞冑彩泉瀉石爭奇洗
殘侵龍沫捫蘿躡鳥達追懽情不極揮翰共裁詩

山下父老喜戴郡侯再至饋蜜醪酌於白雲洞

四郊春雨忽開晴洞擁寒雲沁骨清飛瀑遠從銀漢下
夕陽斜照鐵峯明袞衣東土懷千里紫氣函關喜再迎
三老相攜送酒棠陰猶有白衣情

白雲洞志

四冊

譚清海

字永明東莞人嘉靖初以布衣上十事于朝不報權貴令讀書中秘清海日吾能為真布衣不能為假仕宦固辭歸家近羅浮每朝翔見日臺自稱見日山人著有靈洲草詩文雜著十餘種

白雲洞

西樵勝跡朝元洞萬丈丹梯紫翠連
濯雨飛虹凌白日
千雲孤劍插青天靈姬玉瑟秋仍響
仙客龍宮夜不眠
五百年來應有會石門金簡向誰傳

葉春及

號緇齋歸善人嘉靖王子舉人官惠安知縣擢守賓州以忤權貴棄官歸羅浮築逃菴以居又築獨醒菴與霍益芳友善常入西樵主四峯山館築獨醒臺取羅倫寄詩有獨醒對烟霞之句後以薦起入為戶部郎中學問冠絕于時著有石洞集

白雲洞值雨示何子明

本集作白雲洞口號

洞晚雲隨入巖秋雨自飛莫愁露_沾席猶得浣塵衣歲
月吾將老煙霞興不違昔年招隱處猿鶴爾同歸

王學會

字唯吾南海人萬曆丁丑進士官至光祿寺丞祀鄉賢贈太僕寺少卿著有入楚吟王粲存草山中約言西遊草五羊約注飛雲等集

雲瀑亭

傑構臨丹壑飛軒策勝遊翠崖千仞碧奇瀑一岳幽芳
徑浮觴處良朋笑詠儔夕陽西嶺沒攬勝尙淹留

張鳴韶

順德人諸生

夜宿白雲洞

何處逃名侶雲棲夜討論斷崖懸石榻明月擁芳尊吹

白雲洞志

四冊

二

笛驚螭夢畱詩剝蘚痕平生重幽興仙境倍銷魂

遊白雲洞贈何子明

昭曉山色倚天開幽思雲中不易裁千尺懸崖藏窟宅
半空飛瀑撼風雷爐烟香帶晴霞落劍氣高凌北斗迴
最愛草元人獨暇問奇應擬更重來

邢衍曾

字羨仲東莞人萬歷丙子舉於鄉不仕性通脫好遊自號羅浮山人著有綠水園集

元日白雲洞中貽主人

去年元日夷山出今日樵山仍自看削壁恍疑接筍見
飛湍將並九溪寒侵壇細草春已動應節芳樽誰與乾
知爾層軒清亦足何如風磴坐雲端

韋憲文

見傳畧

白雲洞宴集呈何子明

洞主何年開勝地故人此日共清歌
石爐縹緲香煙細雲磴紆迴玉溜多
鹿洞風花瞻具美蘭亭觴詠問如何
嗟予未盡窮源意空嘆年華一擲梭

何

亮畧見傳

白雲洞呈韋曾諸君

石室初開且放歌樽前詞賦有羊何
窓含翠色秋崖靜門落寒聲夜瀑多
旅雁帶霜來洞口海雲催雨過山阿
相逢一笑真非偶與劇誰揮住日戈

白雲洞志

四冊

三

盧龍雲

字少從一字起滇南海人萬歷癸未進士歷官貴州左參議並有政績平苗以勞成疾將

逝猶呼偏裨語以番情語不及私事親以孝聞學至老不倦著有四畱堂稿尚論全編易經補義談

詩類要祀鄉賢

白雲洞

巖巖翠壁倚天開冉冉閒雲度壑來
野瀑分流成曲水石牀積澗帶蒼苔
芳亭歲引看山屐懸磴時同避暑杯
貪賞幽奇天忽晚又從雲裏戴星回

區大相

字用孺高明人萬歷己丑進士授翰林檢討官至太僕寺丞前後七子稱詩號翰林為館

閣體大相始力祛浮靡還之風雅所著太史詩集使集圖南集濠上集制誥館課雜文諸書行于世

尋白雲瀑布

春山饒勝事花木足清芬傳道溪頭寺來尋洞口雲茗
園春瀑過松徑夕流分雖復通人境猶疑闕鳥文

霍尙守

字益芳翰從孫博雅多才饒邑庠數奇不遇
隱居西樵著西樵志及天下名山水志粵東

名臣志樵
中稟草

白雲洞

雲石參差鳥道迷纖塵不到稱幽棲半空泉落蛟龍鬪
絕巘崑懸日月低澗畔桂叢春自長峯前霞色暮堪攜
勝遊休訝清狂客更上丹崖萬仞梯

龐一德

字與虔嵩次子與兄一夔皆舉于鄉官嘉
魚知縣有惠政能繼父業者有雙瀑堂草

白雲洞贈何子明

白雲洞志

四冊

四

古洞雲生故故幽懸泉况復帶雲流玉龍倒捲寒成雨
海蜃何來氣結樓鍊石只今傳玉女飛花幾度引漁舟
高懷惟有何公子欲共崑阿一榻秋

薛起蛟

字年山一字炎洲又字燭萬順德諸生中明
經利與兄如亨並有文名人呼小薛著有木

未山
房稿

遊白雲洞寄梁台佐老父

白雲深隱接松關別岫新題引蔓攀十里煙蘿呈象外
千家雞犬住雲間浮觴石澗春流滿曲嶮茶畦夕照閑
勝地憑君舒嘯傲西樵應好作東山

曾君棐

南海人諸生著
有灌玉園詩集

白雲洞

不知雲瀑處隔嶺隱輕雷峭壁排天出垂虹捲雨來石
牀荒積蘚瑤草入流杯卽此堪遺世山阿多桂材

張問政

觀音巖

蓬壺碧落嶺雲東靈鷲飛來面面同莫道穿山無佛法
分明鞭石有奇功因尋獅子香臺遠拾得蓮花玉洞中
不是慈航開寶筏陰厓那許一燈通

陳子壯

字集生號秋濤南海人萬曆己未進士廷對
第三入官至禮部右侍郎國變死節諡文忠

國朝追諡忠簡著有經濟言
南宮集禮部堂稿練要堂諸稿

白雲洞志

白雲洞

信有金光窈窕迎夾墀流瀨自縱橫幽厓白日高寒鬪
特地銀河洒濯明霜杵預知秋轉急天瓢還引醉同傾
新傳水次餐花法從寫雲中曳珮聲

何樹德

白雲洞送張熙堂昆仲下山

便爾懷歸動曉烟雲崖流水倍淒然山幽漫說花如錦
市遠那能酒似泉一賦乍驚金石響二難誰別弟兄先
探奇他日重相過還向碧藤舊處緣

陳恭尹

字元孝號獨漉子亦稱羅浮布衣順德人邦
彥子詩為嶺南三大家之一著有獨漉堂集

世行

白雲洞同王川南分賦

四壁石崔嵬飛泉石上來橋分三折入峯折一門開坐
處凝絲雨吟邊滑細苔浮觴不可俟適意探泉杯

汪後來

字白岸一字鹿岡番禺人康熙丙子武舉官
佛山千總退休後遂家焉晚年倡詩社汾江
遠近名士多仰為職志尤擅于畫性高介食貧
自甘不輕以尺幅贈人著有鹿岡詩集杜詩矩

遊白雲洞

玉龍乘雲氣洞門俄啓閉崩地生風雷洗空出蔽翳寒
雨散為星元靈展幽闕分流雪逾疊挂樹日猶媚山橋
既三折一木仍斜倚懸崖高禹穴石級橫鳥吹凝陰思

白雲洞志

四冊

六

所寰抗勢誰能位竦肅懷古人千秋共冥寄聊後磨嵌
岳銘餘抱影睡

馬

焜字文倩本山人
陵水縣歲貢生

春日同汪南湘白岸王素人張在君何仙羽諸子

遊白雲洞

青山老我憶前非勝侶名區喜振衣好瀑出橋迎客入
惟峯當戶礙雲歸呀峨勢削金輪閃腹吹青酣玉屑霏
莫惜疎窓趺坐久月明霄漢晚風微

張錦麟

字瑞夫一字玉洲順德人乾隆戊子舉人著
有少游草與兄錦芳並著才名有雙丁兩到
之目錢辛楣黃
仲則皆推重之

白雲洞

背寺沿回谿倚策聽鳴瀨攀尋屢迷徑到眼但嵐靄不知懸瀑處仍在層崖內洞門闕重陰復與翠屏對三折度危橋坐榻盤石大蜿蜒下玉龍濺沫濕衣帶含風斜更直落澗散還滙垂氣騰雲英遠響入松籟清寒難久居宋靜如有會媿彼洗心人岳棲謝塵壒

黎

光見傳畧

雨後白雲寺散步

昨夜山中雨微雲翠岫遮不知幽洞口流出幾桃花院外蒼苔滑牆陰薜荔斜老僧揖客坐自煮白雲茶按西樵遊

白雲洞志

四冊

七

覽記白雲茶產于白雲洞前亦名寺前茶以洞口有白雲寺也出茶之地不多皆生晒山頂所產者遠不逮

劉南畬雲广山房落成却贈

危樓巧構倚崖高不盡泉聲萬籟號遺蹟百年成莽蒼繼蹤今日屬英豪雲間孤鶴鳴清唳天半朱霞落彩毫听夕過從相嘯詠對君真是飲醇醪

夜坐白雲洞懷關魯翁

殘燈宋宋篔生涼洞口泉聲咽韻長曾記去年春盡日夜來山雨共聯牀

白雲洞志第五冊

藝文 增輯詩

葉春及 見前

出白雲洞

一本洞字下有別何子明四字

古洞何年關長畱宿白雲江山一榻盡風雨半天聞芝木堪時採壺觴入夜分倏然乘月去猿鶴惜離羣

陳堂

字明佐南海人乾隆戊辰進士由司理拜御史歷官南京尚寶卿危言勁節為當世重致仕家居肆力著述往來西樵與霍尚守善著有朱明洞稿及湘南皇華南歸諸集

白雲巖觀瀑

巖在白雲洞裏

天開嶮巖結層巖巖瀑砰磅石削巉坐上風雷通晝夜

白雲洞志

五冊

尊前烟雨濕衣衫銀河倒落飛如練白雪酣歌興不凡

酒罷津前尋去棹輕風搖颺送歸帆

張鳴韶

見前

白雲巖觀瀑

幾向雲中宿石巖舊題苔蘚未全滅坐看垂瀑銀成練
卧傍繁蘿翠作衫塵外自應忘出處杯流那更別仙凡
相攜此日還相賞遙指江天問布帆

區大樞

字用環高明人萬曆癸酉與弟大相同舉于鄉著有振雅堂廉江岳陽諸稿

尋白雲瀑布

側徑縈崖入虛空小洞銜雪飛初夏瀑烟鎖半晴巖煉

藥安金鼎藏書發石函仙杯纔共泛未許素雲緘

梁有謙順德人布衣

白雲洞

石室東懸瀑布西陰崖清晝有颯啼嗟愁散髮流觴後
自剔荒苔認舊題

梁可瀾字元叔順德人博學工詩隱羅浮慕葛稚川
遺草

白雲洞

人遊仙洞多迷路惟有仙人路不迷一片白雲開洞口
野人還往小巖谿

白雲洞志

五册

二

成鷲字迹刪又作卽山號東樵番禺人明孝廉方
國驊子年十三補諸生名顯愷字趾麟遭變
後從鼎湖石洞禪師學佛雲遊諸方繼人慶雲爲
七代主席晚棲大通寺一時名流無不傾慕年八
十餘卒著有鼎湖山
志咸陟堂前後集

題先輩何子明先生讀書處

昔人曾此作經生不復書聲但水聲百尺瀑泉誰識主
千秋崖石獨知名丹梯有路通丹壑赤脚無塵下赤城
更欲假君絃誦地胡牀塞默謝逢迎

梁善長

字崇一順德人乾隆己未進士工詩久作騷
壇提唱嘗搜羅十三州郡蒼翠百家而纂輯

之名曰
詩粹

西樵雲瀑

千仞樵峯石經年瀑布飛隔雲仍有色向日更添輝水
鑿懸霄漢湘簾捲翠微尋源自深處端可滌塵衣

何松字古巢順德人
著有環溪詩鈔

白雲洞

峭壁孤峯削泠泠一水長空中常作雨天半亦流觴古

洞迷春色曇花濕石牀杳然人境外身在白雲鄉

袁枚

字子才一字簡齋浙江錢塘人乾隆己未進士選庶常改知縣分發江南應宰江甯進廷

治體敏而能斷有古良吏之風自丁父艱後不復出卜築于江甯之小倉山號隨園益肆力于詩古文一時名譽傾動四海尤長駢體著有小倉山房詩文集七十卷及詩話尺牘說部諸書行世

遊西樵山左行三里至逍遙石下

白雲洞志

五冊

三

冒暑遊西樵為訪白雲洞渡過兩危橋逼仄不容鞵將

身學螻蟻紆曲穿石縫絕壁飛泉奔激怒聲如聞其下

鑿曲池流觴借水送磨崖字紛紛前明遊者眾左轉尤

奇絕逍遙石可弄萬牛輦不前兩手推可動安得秤象

船一試石輕重按西樵遊覽記逍遙石在馬鞍嶺仙牀石之上大可數圍浮于石表觸之輒動

溫聞源

字華石一字碧池順德人乾隆庚子翰林著有碧池詩鈔

清暉歛雲

雲洞俯層巒排雲出高閣地迴白雲多杳杳生巖壑陰
晴既殊狀變滅安可度入戶漾晨曦當牕橫翠幕倒影
人我懷逸氣增磅礴滿抱芳樽酒適對青山郭日暮意

俱遲悠然欣所託

柳堤鶯囀

偶向山中訪隱淪平隄風物不勝春晴開碧澗鶯初囀
綠倚紅橋柳半勻睨睨乍停疑選樹翩翩如墮欲依人
憑誰更有攜柑約正擬溪南再問津

漱石晚涼

白雲深處結閒緣一抹斜陽夕照邊曲磴月臨殘暑後
平臺人在晚風前座傳響嘯山俱應卧枕情流夢正便
可是熱懷消已盡不須重訪十洲仙

曲水流觴

白雲洞志

五冊

四

寒瀑高空瀉奔騰破石來幾灣齊赴壑一曲遞傳杯婪
尾休辭醉提壺漫更催蘭亭餘韻事傾倒玉山頽

雲門聽泉

一角山亭景自饒雲門流水咽山腰乍聞萬斛從空瀉
直捲濤聲送莫潮

應潮浴鷺

獨拳一足自昂藏濯濯霜毛列幾行人世網羅應不到
滿湖烟水任相忘

巖壑書聲

寂歷疎林策杖過書聲繚繞出巖阿十年未了名山業

正擬雲坳寄一窠

兩儀垂鈞

寄懷天地一身寬
盡日臨流付釣竿
一壑一邱吾自足
不須人認客星看

温汝達

字泉始一字安被順德人候補內
部員外郎著有退一步齋詩鈔

重遊西樵白雲洞龍湫閣主人載酒邀飲盡興而

歸賦此以寄

幾樹垂楊綠映樓

自註洞前
即龍湫閣

洞前重到景添幽
泉聲入座晴疑雨
寒氣侵人夏似秋
詩憶去年題石壁
宴臨曲水泛瓊甌
何時得遂巖居興
竹杖芒鞋共恣遊

水泛瓊甌何時得
遂巖居興竹杖芒鞋共恣遊

白雲洞志

五冊

五

遊白雲洞贈梁石癡

晚雲如練瀑如銀
一幅天然繪入神
醉卧層巖索佳句
與君同是畫中人

與君同是畫中人

温汝适

字步容一字貫坡順德人少穎異年十六領
乾隆庚寅鄉薦甲辰成進士改庶常設館授

編修歷官兵部右侍郎服職中外竭盡心力事父母以孝聞衛桑梓培後進恤困窮人懷其惠生平無他嗜好公餘輒以書史自娛著有構雪齋詩鈔
文鈔曲江集考證曲江年譜韻學紀聞咫聞錄祀

賢

白雲洞

半嶺泉爭流
奇石如渴馬
行人度三橋
乃到層崖下
雲瀑不可名
似是銀河瀉
陰疑風雨至
晴見輕烟惹
昔人

此讀書結構無片瓦梯險到雲巖不異居廣厦至今有
遺跡緬想幽棲者逕斜苔石滑赤足自瀟灑出山未亭
午秋稼滿平野重來亦有期待取水綃寫

張錦芳蔚里見前著有
逃虛閣詩集

白雲洞

沿澗迷行蹤架壁盡冥晦洞門杳何所合沓巉石礙山
靈閔奇偉境絕恒自愛誰遣泉出山喚客鳴環珮跼步
叩虛牝谿衍失向背身入寒雲中匹練光破碎不知泉
落處想像自雲外坐收盤石流繚繞作衣帶讀書昔人
遠後至罕津逮剔薛呼老龐長歌散烟靄

白雲洞志

五冊

六

李

澤一字函谷南海
人壽九十餘歲

靈鼇吸波

洞口吹風腥洞裏寒雲積探竒入控隴峯巒凝紺碧顧
盼心神馳瞥見靈鼇石苔漬老霜鱗飛瀑澣雲脊流急
山根移波翻日色白魚鼈爲奔趨烟霞長護惜不知天
地大獨覺巖厂窄何年任公子投餌風雨夕長竿取爾
來鎮此山泉脉

清暉欸雲

高閣出青霄浮雲日繚繞上有雲中人倚欄獨憑眺意
氣生幽閔襟懷發炳耀觀彼來無心悠然入清妙颺袖

爲高歌曲終作狂嘯

鑑湖印月

樵山山色殊鬱青中湖湖水生空明我來讀書日不厭
薄暮小憇神俱清寒烟頓覺四山白爛銀盤湧波光凝
水天一色上下接芙蓉倒影涵金精泉石寫心有真樂
林巒寓目堪娛情心搖目蕩不暇處如許物色難爲名
水壺獨對夜不寐徘徊直待天雞鳴

柳堤鶯囀

花光爭映鑑湖邊夾岸垂楊綠鎖烟求友鳥歌金縷曲
游春人駐紫駟鞭好將俗耳風前洗莫把離情樹底牽

白雲洞志

五冊

七

鼓吹詩腸饒韻事雙柑懷袖趁晴天

海屋滙流

石宇靈鼇下三湖滙眾流試尋觀水術活水有源頭

古井流丹

碧甃涵靈液真如種壽泉東西樵不遠疑有葛洪仙

雲坳朝暉

轟石開屏障烟霞擁翠微三竿紅日上愚谷有光輝

蘊玉夕照

山輝花掩映築室小桃源薄暮一憑眺殘陽似石門

雨儀垂釣

石橋流水日迴環兀坐榕陰一釣閒世上風波原太險
客星長耀富春山

石壁探梅

春信分明到嶺南
閒拖雙屐破層巖
不知有客山窓下
細把庖犧易理參

陳璉

華蓋觀瀑

大科峯頭走白龍
蜿蜒繞出青芙蓉
披煙捲霧隱復現
飛下雲坪第幾重
憑虛噴薄一痕白
界破翠崖數千尺
晴空風雨鎖巖陔
浩浩松濤萬壑秋
飛湍激石石將轉

白雲洞志

五册

八

雪浪撼山山欲浮
浮山轉石肆磅礴
五丁鬼斧何年鑿
頓洗煩襟三斛塵
心源活潑從疏瀹

梁昌聖

一字拜善乾隆辛巳進士選江蘇江浦知縣
調震澤遷晉州有訊讞才不事搆撲能決疑獄
多所洗雪著有碧霞詩鈔刻方園詩箋

春日訪余孺如於白雲洞三湖書院

鶴怨鐘山蕙帳空
塵容重問白雲叢
荆扉剝啄斜陽人
蠟屐蹒跚石磴通
幽寂堂階沿帶草
尊崇臺座滿春風
客來剪韭三湖畔
共對巖花蘊玉紅

譚

澄

字漪美一字天池新會人諸生著有天池詩草

擁翠評花

山花紅滿罩山亭別出嫣然入眼明豈有奇香投俗好
故畱絕品待真評眠雲客到憐新艷夢月人歸惜落英
我欲憑欄深賞識吟工高格結詩盟

陳文耀見傳畧

秋日遊白雲洞擁翠亭

參差砌遶翠如屏不盡湖光入短檣疎點秋陰桐雨碧
密搖山影竹風清珊瑚架插鶯飛羽玳瑁簾開鶴展翎
更上清暉樓上望雲烘花氣有餘馨

杜和鳳

曲水流觴

白雲洞志

五册

九

巧分山澗水宛轉遶盤陀便擬觴飛羽還同沼泛荷排
雲依曲磴送月倩迴波應許蘭亭後風流繼永和

琴壑蛩吟

誰鼓不絃琴幾成巖壑音靜聆青草際應伴石魚吟

周之純

以字行一字建堂南海人諸生著有理琴軒稿

靈鼇吸波

搜奇人雲峯寓目添奇況何來石更奇突作靈鼇狀之
而揚爪鬣怒與飛濤抗張口恣鯨吞喧雷翻巨浪有時
溢餘沫淵止無盡藏遊客偶憇此幾許窮形相或云補
天餘遺作介蟲長或云瑤光化閃爍金睛放我意殊不

然自昔經洪漲一股戴蓬萊近與羅山傍
勳肩力旣舒蹒跚隨浩蕩西望白雲深
伏處潛榛莽只今風雨飛噴薄神猶旺

何輝喬

攻玉聽蟬

獨上高樓峭壁開鳴蟬何處急相催
四邊佳色座中見一樹秋聲樓下來
葉落冷歸芳草外風高寒入遠山隈
逍遙惟有客長嘯獨坐無言對石臺

應潮浴鷺

白鷺忘機老釣磯平湖活水恰相依
倦遊多恐塵氛染

白雲洞志

五册

十

自啄霜毛不更飛

巖壑書聲

書聲隱隱出巖阿石壁依崖掛薜蘿
白日柴門深不鎖澗中流水鳥啼多

劉日昇

南海人
國學生

玉池墨浪

分題滌硯臨流水角勝操觚就玉池
一片黑雲凝作浪管教爲雨定催詩

何碧璵

順德人
國學生

蘊玉夕照

斜日掛寒峯雲遮萬壑松湖光半明滅倒浸碧芙蓉

關敏夫見傳畧

三湖書院雨後卽日喜同社諸子適至

山靜何嫌瀑勢喧化機終古此潺湲雲溶水墨濛空谷
風遞寒嵐襲遠邨甲子渾忘無歷日乾坤高曠有青尊
朋簪夙約尋幽興得得相期屐到門

黃 虞見傳畧 鄧士憲填諱

自直假歸初夏遊白雲洞

廿載風塵憶白雲一聽雲瀑返吾真當時結構龍從在
得地樓臺點綴新泉愛在山清滌暑詩緣探勝興隨人

白雲洞志

五册

十一

自註時與岑璞軒諸君結吟社于漱芳園三湖近接桃源路

盛世幽棲豈避秦自註新增三湖書院小桃源諸勝

白雲洞感舊

倚天峭壁高無垠混沌未判涵氤氲何年巨靈運斤斧
訇然石破當中分蜿蜒玉龍舞幽壑洞天福地前無聞
白雲先生名山主關洞獨居謝紛紜旦夕嘯傲吞雲氣
名流唱和騰芳芬趙公築亭愛雲瀑亭芳故蹟徒傳云
榛叢草茁竄蛇蝎撥霧探天獨遇君屐痕穩踏芝徑滑
琴聲揮入南風薰我憶把臂買山勤寢食烟霞誰與羣
巖從閣前秋日曛招魂欲賦慙無文君今竟乘白雲去

白雲還自爲白雲

先大父舊稿淹沒于甲辰水災所有皆致仕後作

溫汝能

字希禹一字熙堂晚號謙山順德人乾隆戊申舉順天鄉試官中書科中書尋乞歸事著述築中齋於蓮溪上藏書數萬卷寢饋其中著有謙山詩鈔文集制義孝經約解爾雅圖註嶺南文

海詩

九月六日爲余生朝招同鄧逸堂陳俊夫家弟綸

章六松空翥登樵山遊白雲洞分賦

秋風吹衣袂爽色生畦塍肩輿縱所適樵山忽峻嶒昔
慕白雲子深隱看雲興聽泉心在水卧石懷親水迄今
千載下洞雲猶鬱烝喜余六人至先後成游朋撫髮思
黃菊攜筇快躋登鄧君康且壽期以岡與陵陳子樂絲

白雲洞志

五冊

三

管調高遏雲層六松貌新瘦詩骨蒼逾稜迺憐蔡湘臬
病足同拘繩空翥本山客結廬除舊藤難兄得酒趣醉
輒與余鷹子今過半百相對髮鬢鬢所耽各痴癖窮險
忘凌兢林泉苟可樂王侯鳥足稱十年苦徵逐今茲愜
胸膺世途嘆翻覆羈縛將不勝譬彼出林鳥時時念已
繪何如作逸計寧謂吾言徵絕人今未敢誅茅意常承
諸君恐余負願證雲中僧

游白雲洞

落日依雲壑層臺聳翠觀瀑從雙壁合客擁一橋寒度
澗看松古聽棋坐石寬興游思待月高詠且憑欄

温汝進

字履安一字杯湖順德人嘉慶癸酉舉人著有津奇齋詩鈔

由官山市步至白雲洞

艤舟山市下春風一何善結侶事幽探挹翠心遙羨西
麓路盤紆雲洞隱復現林坳露微白何人久垂練幾度
越礪谿漸覺銀浪濺峻壁陡當前途迷目為眩畧徇宛
轉通跳珠紛打面嶂列如峽束入坎詫新變石勢何曲
沸泉亦厭平行相激豈云爭往復作周旋是時凍已融
凜如集霜霞洗心坐盤陀流杯開薄宴日昃四山陰欲
去猶依戀賈餘上敬臺尋芳叩深院歸來衣帶重白雲
霑一片

白雲洞志

五册

三

馮

肩

字步莊一字心海順德諸生著有棲雲山人詩草

壬戌正月偕温杯湖進梅環中齟遊白雲洞有感

泉石無殊院宇非廿年前事記依稀吟聯攻玉寒相倚

自註庚子八日與關魯窩等七人自棲雲過白雲是夜集攻玉樓上席坐擁爐聯吟達曙坐遞流杯

醉共歸游客已分今昔感自註時魯窩廣明高亭梅庄俱已去世白雲何

獨去來飛他時世務粗能了重整山林願不違

黃天柱

一字悅桐順德人性好道中年簪冠于羅浮黃龍觀日與羽流相往來乾隆辛亥壬子間

寓居攻玉樓琴書自娛飄然有遺世之意

留別白雲洞

高山流水與琴宜幽契憑誰問子期一自檢書歸去後

此心惟有白雲知

邱士超觀傳

白雲洞觀瀑布

絕壑奔騰恣澎湃湯湯天半瀉清快放開玉峽飛白龍
一條千古青山界渡橋乍聽轟雷聲耳目酣暢心神驚
宇宙奇觀已在是匡廬竊獨專其名蝸角蠅頭不暫息
得常欣欣失常戚安獲清泉洗道心對此翛然快胸臆
洗心石上同徘徊天機鼓盪塵緣灰珠玉錯落勢空湧
吟興勃發心花開君不見溪澗微流寡原本灌溉無多
體清淺豈如活水來源頭一瀉萬里支流遠

白雲洞志

五册

十四

秋飲白雲洞

把盞西風賞落暉洞中雲瀑底秋微螺峯青入平原酒
湖水藍侵郢客衣濯足野人拖屐去枕流高士袖雲歸
醉來攜手池邊立笑指林鴉也倦飛

張琳見傳畧

遊西樵白雲洞

天公狡獪犬好奇陶甄山性非人爲有如文章貴逋峭
掀騰兀冪無平夷西樵七十峯峯異朝元古洞尤奇致
環城削鍊矗雲根拔地倚天盤氣勢劈空一面峽門開
石橋雙跨凌波來虧蔽曦娥食天小撲衣寒翠驅塵埃

半壁何年破鬼斧虛巖砢廊廡踟躕大士斷聲聞
烟雲繚繞清虛府摩崖三字弼唐題壁窠書法蟠蛟螭
名山亦藉名賢重紫陽鹿洞同瞻晞旁魄狂濤噴絕巘
界破青山飛素練逢逢聲鼓阿香車閃閃光搖童女電
驟驚白日風雨來三伏陰森作寒戰下流奔注激箭忙
繞渠旋折穿羊腸洗心石畔跣足坐天然曲水傳流觴
平生意氣凌九有名勝胷中吞八九貺我茲遊境絕奇
且酌山靈一杯酒

前題

朝元洞口紫烟浮行盡危橋景最幽石壁百尋撐漢立
白雲洞志

五冊

五

濂泉一道帶雲流澗邊水泛千觴酒樹底風生六月秋
奇境自堪誇獨勝休論七十二峯遊

西樵濂香書室

結廬堪小隱桐竹蔭闕庭雲影侵簾白山光入座青掃
枰敲奕譜試水晶茶經剝啄朋過少無煩遣僕聽

披雲臺

高臺凌碧漢登陟覺身尊塵界眸初豁雲山氣已吞晚
霞明遠浦春樹隱孤村風景真堪繪新秧綠滿原

藜照雲厂

自註在西樵白雲洞

蕭齋卜築稱心裁十笏居然好景該愛石一隅將壁讓

自註西壁嵌石在內 看山四面把窗開花浮活水穿堦去雲趁
輕風入座來淨几名香春晝永詩情頻被鳥聲催

石門即雲門

巨靈擘雙崖峙立作門戶日夕無人關白雲爲掩護

琴壑

幽壑流泉咽淙浚自古今何須彈綠綺山水足清音

小桃源

幽境遊踪少闕雲自往還桃花隨水去流不到人間

應潮湖

湖口接奔泉滔滔流不盡消長與潮同常報山中信

白雲洞志

五冊

六

重遊白雲洞

遊山如讀書奇妙時搜尋際茲霽景明蠟屐重登臨沿
磴探靈穴捫蘿陟危岑暫領烟霞趣差酬邱壑心虛巖
積寒翠流水含情音崖光銜夕照林蔚鳴春禽盼眇符
故賞蒼茫發新吟更採華芝去白雲山徑深

平生慕隱倫所志在邱壑豈以塵網嬰而忘山林樂憶
昔誅蓬苒憑崖建高閣鑿石疏清池開畦蒔靈藥茲遊
踰十年風景尚猶昨青山同故人見我如喜躍左招右
復迎煙雲相酬酢晞髮臺堪登解纓泉可濯何當遂元
棲巢許庶永託

崔振鼇見傳

張贊府竹邨約遊白雲洞因雨不果翌日作此以寄

好山不屢遊山靈笑跼蹐昨聞寸簡招已蠟謝公屐高
聞忽重陰一雨阻行跡林深濕翠飄徑滑蒼苔蝕悶坐
掩柴扉甘同棲鳥息今朝清晨起山遊興彌亟兩脚又
低垂鳴鳩聲轉逼山緣知尙慳未可恣遊適佇待放新
晴西爽豁襟臆與君策枯藤飽看青山色

黃

維字時望一字勉堂南海人國學
生嘗結吟社于白雲洞嫩芳園

東州署寄懷白雲社中諸子

白雲洞志

五冊

七

東州何處望樵西裘葛屨更數別期萬里遠馳鄉國夢
一窗寒讀故人詩聯吟樂事離方憶悞逐征塵悔已遲
爲問林泉舊風景遊蹤曾否似前時

黃培芳

字子實一字香石香山人嘉慶甲子副貢官
國子監典簿著有嶺海樓詩文集易宗雲泉

隨札浮山小志粵嶽子虎坊雜

識史傳事畧經義詩話諸書

西樵白雲洞觀瀑

陰崖幽闕虎豹蹲誰劈鬼斧開一門攀林陟磴始到此
跨流飛度窮雲根四圍石壁倚天立忽裂石骨傾靈源
仙人偶在山上過天瓢悞向雲巔翻百尺斜飛破空下
瓊瑰倒瀉驅龍奔山靈一洗萬古俗振蕩林木清心魂

昔我東樵展高步水簾瀑布幽且繁九百八十看未足
還來此地觀潺湲白雲冥冥滿巖谷雲容水色相吐吞
探奇得此復歎絕七十二峯休更論

何殿春

字寶錫一字紅藥新
會人道光辛巳副貢

西樵山靈鼇石

帝命負五山汝鼇實有力萬歲一交代十五各稱職胡
乃戴蓬萊忭舞恣轉側吹唇溟海翻伸足地維坼女皇
補天暇斷汝立四極龍伯遣巨人一釣六皆得灼爾專
車骨性梗終難克頑魄不肯死化石入海國不敢下汪
洋恐被祝融殛深山與大壑爭此蛟龍食腹睛元枵虛

白雲洞志

五册

六

口哆南箕窄脊攢吳劍利尾曳韓椎直噪叻截下流饒
涎濫旁溢吐吞互闔闔盈縮應潮汐狂雨交風雷波濤
爭咫尺我從烟際來跛蹙臨不測天光水怪與潭冥昏
黝黑會當騎汝去鼇乎莫惡劇

凌揚藻

字譽釗號藥洲花農番禺人諸
生著有海雅堂集選嶺海詩鈔

岑詹雲索題西樵白雲洞二十四景

錄六

秋色無淺深寓目卽幽負澄澄鑑湖波皎皎浸寒鏡圓
光與粹容俯仰得真性霜飛清夜闌天空萬緣定鑑湖印月
人谷驚喧歷飛湍搗石穴以我無懷心覩彼有聲雪未
解清淨理頗覺自怡悅頃洞融心神欲辨無言說華蓋巖

冰雪清吟魂梅花有風契况當凌絕壁觀此孤高勢艷
破煙欲暝寒江月初霽心醉澹無言幽香襲衣袂石壁探梅
壘塊久鬱積無由發奇弄登高一舒嘯山驚白雲動響
散風茫茫陡覺天宇空多事下方人輒擬蘇門鳳道遠長嘯
化工著羣物所過不留迹虛室夕陽間澹然見秋色一
叢花影深幾樹鳥聲寂誰傳小李意寫此空山碧韞玉照
瑩潔寒無波陰森古井水金石流清芬甘冽澈骨髓至
人寶心丹不越方寸裏幾欲下修綆尋虛費研揣古井

登華蓋峯憩環綺亭望廣朗坪飛瀑

西樵之泉三十二勝事在昔披圖經白雲流水起胸臆

白雲洞志

五册

十九

往往掩卷心迴縈名山咫尺今始見冷翠亂撲環綺亭
巖巒孱顏木芙蓉石氣丹碧苔花青空山無人白日靜
長虹飲澗喧新晴磊磊落落雪有聲敲瓊濺玉森瓏璫
天公怒烈散飛雹砮崖裂石轟雷霆豁訝大谷互響答
一落千丈蛟龍驚倏然獨立竦毛髮沆瀣入骨風稜稜
金篦刮目倏開豁芥蒂一洗塵慮清神融意愜恣幽賞
媿無好句酬山靈匡廬五老久招手何時更約山翁聽
行當效彼廣長舌萬斛屈注吟清冷

漱石臺晚眺

野靄依微鎖夕陰平臺向晚足幽尋寒泉咽石白雲冷

秋色染衣黃葉深靜愛風聲來別壑澹宜嵐氣薄高岑
悠然一杖斜陽外獨立蒼茫萬古心

岑宗遠

名連魁以字行一字澹雲
南海人著有蟬吟小草

崧龍候潮

元氣通山澤山潮應海潮潮生雲瀑外人倚夕陽橋圓
月湖光滿迴風浪影搖箇中參妙悟神與理俱超

岑清泰

名澈別字鐵君南
海人著有鐵泉稿

雨後遊白雲洞

曾幾何時辭故山荆棘既滿三百蟠蒼苔得雨漸幽茂
壞壁映日空巘屹蛇行轉入地肺窄自註從若谷入上
壓巨石下有小路

白雲洞志

五冊

三

可進奇猿進始出天宇寬小橋斜度曲澗口拄杖徑達
境也 蒼山根當胸瀑布忽陡落日色未灼吹古寒頗疑腹有
海藏竅噴自荒遠應愁激雷驚電掣奪隘走遇石一激
成飛湍水花如雪倒上面餘勢直射浮雲端勾勾萬馬
騰一鼓聲入空際何喧喧遊人對面不得語盡道聾啞
爭欺謾茲山之遊亦已屢未若此際能奇觀夕陽魚貫
競出黯歸來臥榻聞掀翻題詩火速摹絕境合眼一過
空長歎

李吉林

見傳畧 以下續補

讀書小桃源友人過訪留題次韻奉和

小桃源裏獨遊神忘却吾生有此身流水韻高頻洗耳
山花清絕不沾塵論交世外松爲友卜築巖隈石作鄰
吟場任教高士臥孰爲東道孰爲賓龍門又有半枕靜
眠琴壑月一竿閑
釣鑑湖魚之句皆有清思
是能深領個中風味者

梅璇

字冠衡一字環中順德人
諸生著有艾納香齋詩鈔

游西樵白雲洞懷左靜淵

蓮峯簇辨插天開往哲風流此溯洄白社最憐君早逝
青山應笑我重來閒舒倦眼雲千疊冷沁愁腸水一杯
曾憶雞鳴觀海日攜壺同上大科臺

陳濟時

字復深一字克山順德人嘗在白雲洞肄業
居母喪廬墓三年服闋客貴州興義府因入

白雲洞志

五冊

三

籍補部弟子員以明經授訓導歷署都司
府教授開州學正著有廣業精舍詩鈔

曲水流觴

池曲流觴好剛來童冠羣瀑飛花帶雨杯轉水生紋解
禊懷孫綽畱題憶右軍樵西幽勝處一醉共眠雲

馮

肩

見前

靈鼇吸波

石壁破山腹洞敞白雲壑壑底水喧雁洞口石磯砢一
石截流起狀若鼇騰踔昂首吸清波奔湍互激薄濛濛
白日昏濕雲天半落勢欲傾河漢氣直摧蓬嶽安知鮞
魚化無乃鬼斧削抃舞亂流中真幻誰能覺

老鳳倫

字濟芳南海人國學生

上巳與關占圖叔雲中白雲洞小酌觀瀑

洪瀑奔流峭壁開蜿蜒飛下玉龍來霏霏亂激巖頭雨
曲曲遙傳澗裏杯乘興共修沂水禊爭眠不掃石橋苔
鐘聲隱約斜陽外猶聽雲濤未肯回

洗

煒一字丹崖南海人諸生

秋日登龍嵒閣

峭閣深深晝掩關時聞飛瀑瀉空山山巔風影翻殘葉
閣下湖光照古顏熱劫已隨流水去幽懷都付白雲閒
登臨日暮渾忘倦滿目烟嵐指顧間

白雲洞志

五册

三

陳

廉一字石泉南海人諸生

三湖書院雨中聞鶯得聲字

隔簾細洒霏微雨入耳流鶯歷亂鳴金縷乍翻求友曲
綠楊深隱讀書聲穿林擲去衣應濕出谷飛來語更清
佇待春晴湖上立攜將柑酒聽分明

洗天球

一字璞齊南海人諸生

龍嵒閣下梅花盛開借蔡遜之楊圖南作

梅花占得小春芳洞口欹斜露半藏湖水光中橫瘦影
巖隈深處鎖寒香雲歸合襯孤高格月落還描淺淡妝
正喜隔橋清友到巡檐索笑與偏長

陳文耀岑懷瑾李掄才俱見前鄧祖兆字祥昭一字雪峯南海人嘉慶

丙寅歲貢關敏夫崔振鼇並見前潘吉士南海人乾隆戊申順天鄉試舉人

余經南海人張玠南海人關鳳鳴字雙長一字丹山南海諸生結漱芳

吟社馮汝楫字仙樹號夢巖南海人乾隆余迪黃維並見前

李秋漢字雲瞻一字倬亭南海人諸生薛觀齊一字瞻軒順德人余昌南海諸生

岑毓楠何尙英莫汝雄俱南海人余鴻瀚見前

白雲洞送張公祖赴都聯句按張公祖諱道源號浮山守廣州八載岑

璞軒等建三湖書院以白雲洞二十四景題徵詩公為評定以李函谷詩為冠軍至是將赴都

卸篆乘閒訪白雲洞諸文人聯句送行亦佳話也

八載著循良陳文耀徵書起南服父老走壺漿岑懷瑾謳思

白雲洞志

五册

三

徧巖谷憶公甫下車李掄令民笑佩犢鄧祖兆雅化野雉

馴直道江濤伏關敏夫絃誦肄菁莪門牆環棧樸崔振虛

堂絕爭訟潘吉士闕庭蔭花竹余經公餘樂鳴琴張玠神

清欽式玉鳴關鳳一錢去山陰孤鶴出西蜀馮汝楫今公繼

高風茲郡畱芳躅余迪散作珠島光黃維同流香浦馥

岑懷瑾春臺風微和炎州雨霽霖李秋恩波鷺潭深薛觀

風雅樵山曲余昌白雲緬前修鄧祖兆清流洗汚俗岑毓楠

松柏植巖阿甘棠愛樵牧何尙英改歲秉節來莫汝為公

慶尸祝余鴻瀚懸知清廟器馮汝楫豈為一邦福岑懷瑾還將

海國春萬方咸煦育黃維

劉子秀

見傳畧

癸卯再續補

早起登白雲石室觀瀑

闕壑陰欲蒙虛崖雲尚宿披衣啟松門躡梯履盤谷洞
口嵐靄昏蒼翠凝寒綠幽巖開半壁闕磴僅容足猿援
彳亍行捫石隨偃仆置身崖屋闕側睇千尺瀑蜿蜒下
玉龍倒射傾林麓破壁走雷霆轟響搖心目垂氣散崇
巒飛雨濕晴旭曦光上翠屏山容靜如沐清寒難久駐
幽賞戀遐矚對境正忘言松花應新熟

雲广夜坐

暮色斂翠微蒼然蘿磴夕虛館風泠泠皎月當堦積泉
白雲洞志

五冊

三

鳴空籟清夜靜澄潭白暗中流真香花露滴蘚壁欹枕
石牀幽何以慰岑寂舍情緬佳人迢迢碧雲隔

雲洞月夜喜李嘉善至

寒泉乘月汲犬吠隔溪喧寥寂空山夜幽人忽到門
往白雲洞訪何滋甫時遊接乘菴方回

暇日尋幽試一登思君身在白雲層重巒帶雨天將暝
飛瀑轟雷洞若崩幽鳥出林迎野客主人采藥伴山僧
歸時倚杖溪頭石報道巖扉又得朋

寄關魯窩時在白雲洞葺環綺亭

獨向雲溪抱石眠知君新架綠蘿椽名山自合幽人築

古調親操白雪絃芳徑芝童行採藥綺窗芸侶證陳編
洞中我亦曾遺構魂夢長如瀑布懸

余始輯白雲洞志卽屢求南畝詩稿未獲壬寅先生
嗣孫光祖從余遊癸卯初夏于其故舊家覓得先生
遺草一帙示余丞爲續刊若干首噫先生手輯西樵
遊覽記名山勝蹟藉傳不朽又嘗于洞中築雲廣以
居其高懷逸致有足多者此人此詩皆不可沒也

鼎建龍從書閣及置本山地段碑記

龍從書閣每股捐銀拾兩鼎建或一人兩股或每人一
股或兩人一股經始於乾隆乙未十月半載落成丙申
臘月十七日始奉 文帝陞座時有喜鵲回翔觀者羣
致慶焉茲將文會芳名勒紀於左 黃孚初貳股李容門
壹股黎萃堂貳股關
魯窩貳股劉博堂貳股鄧聯芳貳股李義山吳玉堂張
勇佳林華遠馬雲峯愛瀾堂沛瀾堂求志堂崔居成崔
述華盧月波法忍堂澤遠堂何聖倫屏書軒淑芳社弗
護堂李攻玉李凌雲李士龍張榮翰崔鶴朋張儒儕李
才抱璞軒植荆堂馮國兼已上各壹股崔魁彥李達明
崔訂雅何茲甫崔魯齋李星池崔青雲鶴和堂廖北溪
何振倫盧璋士崔衡舉崔竹林顯
承堂崔浩元李宜卓已上各半股

白雲古洞自觀察何公始闢今日繼起亦盛事也洞口

白雲洞志

五册

三

地臺下至石屋係梁偉然讓出契載貳畝伍分陸釐貳
毫中幅上自石壁至小瀑瀉落水坑為界契載貳畝陸
分叁釐五毫讓自長房左幅大段上至香爐峯下至靈
鼈石東至水坑西至趙山界至分明讓自四房右邊乃
景存祖讓出契載上至引水坑下至長房送出之地為
界俱簡村東頭梁姓者也每股價值當眾送還梁姓永
遠生息自行辦納糧差與書室文社無涉附諸石刻誌
不朽焉乾隆四十一年歲次丙申臘月吉日首事黃虞
李掄才黎光關敏夫謹識

白雲洞志刊成同人陳竹洲從李龍門家覓得此碑

文揭本見示喜不自勝念斯洞闢自前明嘉靖間至是幾二百年始有人焉繼起時李容門黎萃堂關魯窩諸先生暨 孚初公皆清貧士非藉同志諸公鼎力捐貲曷克以濟矧購地一節尤費苦心非尋常建置者比斯洞既歸文社可以為所欲為讓帖內書明任從打石建相樹林造書舍種厥後書室踵相繼興端由於此爰將全碑刊附卷末不敢以其股分瑣屑隱而不彰也 同時事首尚有龐錫澍陳世堂二公 孚初公手書重關白雲洞引稿尙存可據今碑內並不存其姓字豈二公會倡厥始未及觀斯閣之成歟黃亭附識

白雲洞志

五冊

三七

攻玉樓李攻玉建

按志作石岡李氏攻玉即其社名

雲廣劉博堂建

按志同博堂亦南畬別號

三湖書院金旣紳士建

按志同

環綺亭關魯窩建

按志同

向往居崔述華建

按志畧 今按述華南海人崔文學令儀之祖

濂香書屋濂香社建

按志畧

屏書軒張覺圓建

按即張玉峯兄弟同建志畧

枕流亭李孟廉等建

按志同

考槃崔玉泉何仁風建

按志缺

蘊玉山房溫懋園建

按志同

滌心橋崔東啓修

按志

以上各書室大都建自乾隆丙申以後三湖書院更遲之十四年蓋後來續刻于碑未者凡志中缺畧數條應補人第一冊因其人爵里未詳姑存此以俟知者亨再識

白雲洞志

五冊

天

西樵雲瀑羊城八景之一也八景中以西樵雲瀑
爲最勝而樵瀑則以白雲洞爲最勝吾越名山以
西樵得名爲最遲而西樵諸名勝又以白雲洞得
名爲最遲湛李方霍諸賢遊蹤曾未之及嘉靖初
何東江始闢榛莽厥子亮繼築巖阿記之者龐弼
唐詠之者葉石洞韋鷺洲銘之趙蘭谿構亭橋焉
洞名稍著矣而初無志乘也其著於書籍者始自
郭夢菊之嶺海名勝記繼以霍益芳之西樵山志
由畧加詳然而高人蠟屐名士吟箋仍多闕載乾
隆間吾鄉黃孚初師與黎萃堂輩因雲瀑亭故址

白雲洞志

五册

五

改建龍嵒閣時劉南舍築雲广著西樵遊覽志全
樵形勝搜輯綦詳而同時温憇園所闢蘊玉山房
岑璞軒倡建三湖書院及嫩芳吟社其人其事未
及踵誌於篇迄今四十年來院舍傾頽鞠爲茂草
戊戌春家鑒堂觀察移主越華講席攜翔與偕夏
黃孝廉嘉圃月夜過訪調以詩翔次韻述懷有白
雲洞口結蝸廬之句觀察見詩詢之欣然以倡修
爲已任卽和二章屬嘉圃與翔更聯同志修復故
址嘉圃又不忘其祖之遺美先訪輯前事爲志一
卷出以相質竊以爲院舍之或建或圯時有廢興

賴有誌乘詳書傳之廣遠讀斯志者遊斯地而後
知白雲洞爲嶺海第一名勝洵不誣也卷中所載
前事已詳此次增修事成應加續志蓋卽今日之
建置吟詠詎非一時盛事而爲異日修志者所採
訪耶道光己亥中秋後二日愚弟鄧翔拜跋

白雲洞志

五册

三

鄧英元承刊

